




Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.96/a






Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.96/a



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.96/a



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.96/a

1.7.96

15- 1

PETRI FRANCII
EPISTOLA PRIMA

Ad

C. VALERIUM ACCINCTUM,

Vero nomine

JACOBUM PERIZONIUM,

Professorem Leidensem :

Qua vera causa abortae nuper inter illos inimi-
citiæ , & nuda ac simplex facti narratio
continetur.



AMSTELODAMI
Typis THEODORI BOUTEMANNI.
c15 15 cxcvi.

2

PETRI FRANCHII

EPISTOLA PRIMA

AD

C. VALERIUM ACONITUM

Non habito

JACOBUM PERIZONIUM

Professorem Astronomiae

Quis scit quid sit Astronomia? Non illos sciam
quos, & magis de his quae sunt Astronomia
scire, & magis de his quae sunt Astronomia



AMSTELÆDAMI

Typographia Universitatis

et in officio



Candido & aequo Lectori

S. P. D.

PETRUS FRANCIUS.

T *Empus ad hoc, lustris jam bis mihi quinque per-*
actis.

Omne fuit Musae carmen inerme meae.

Liceat enim cum meo me ordiri Ovidio; nam eodem pro-
pemodum aetatis spatio, quam ille tum egit, peracto,
meum item ego sum expertus Alastora, ut ille suum. Non
defuerunt scilicet ab omni aevo invidi homines & mali-
gni, qui praeclara morderent ingenia, & quod ipsi prae-
stare non possent, in aliis carperent: ut enim umbra
corporis, ita virtutis comes invidia est. Idem videli-
cet mihi subeundum fuerat fatum, qui uti viris istis
praestantibus nec ingenii nec doctrinae laude me parem
puto, ita in hoc certe cum illis aliquam habere similitu-
dinem videor. Quippe quum pacem sectatus sim ha-
ctenus & quietem, neque ullum omnino bonum cum
animi illa tranquillitate duxerim comparandum; & per
omnem vitae meae decursum ab omni semper lite &

A 2

con-

4.
contentione abstinere studuerim; nec cum quoquam
unquam mortalium ullas susceperim inimicitias; exitit
quidam nuper, qui ab isto me vitae proposito revocaret,
homo pacificus, & ingenii minime mali, sed qui per
aliquot jam annos continuos rixas istiusmodi litterarias
fovet, ac nutrit, & cum omnibus paene hominibus
bellum gerit. Is cum variis me carminibus laceffisset,
ineptis illis quidem ac plane ridiculis, & nullo prorsus
Attico sale, sed felle tamen multo ac veneno oblis; meamque non minus famam, quam artem, quam
profiteor, proscidisset; visum fuit illi reponere aliquid,
& Epigrammate uno aut altero lusi cum homine po-
tius, quam quod ullum in eum convitium jecerim, aut
dictum aliquod virulentem. Cum non desisteret, &
ex obliquo me invaderet denuo, occultato semper & ce-
lato nomine, provocavi istorum auctorem versuum,
fateor, acriore paullulum carmine, quicumque tandem
is esset, ut è latebris ac speluncis prorumperet, & no-
men ederet suum. Nec vero alio sese ullo indicasset
modo. Moris enim est hominibus istis, non rectam
instruere aciem, sed ex occultis insidiis in hostem im-
petum facere, & *latranculorum* turpium *instar*, *furari*
victoriam potius, quod sibi ille indecorum putabat,
quam aperto Marte contendere. Et sane cum Philippo
bellum gerere malunt, quam cum Alexandro; id enim
tutius multo, multoque securius. Nam & quidvis in
quemvis dicere possunt, dum latent: & ubi dixerint,
omnem rei invidiam à se derivant. Sic ut *impar con-*
gressus cum isto genere hominum futurus sit illis semper,
qui recta, ut decet, ac regia, procedere volent via neque
enim ullum est veritati cum mendacio ac dissimulatione
commercium. Eandem fortasse sortem verendam mihi-
ani-

animadverto, & ut pro Aggressore & Convitiatore à nonnullis habear etiam, nam & suos ille habiturus est assclas, futurum plane praevideo; sed meae ratio vitae, & animi mei indoles, & ipsius historia facti, ab isto me facile crimine vindicabunt. Sed quisnam est iste, quem dicis, adversarius tuus? liquido affirmare non possum. Ipse enim non indicat, & quamvis se satis cognitum dicat, subinde tamen refugit rursus, & suos se condit in saltus; nunc *cum aliquo*, *nec ignoto* mihi homine, nunc *cum Nemine* certamen futurum affirmat; nunc *à se profecta omnia confitetur*, quaecunque in scriptis istis Eristicis continentur, nunc se *scriptorum istorum auctorem* negat: se tamen *Scurram* illum *Litterarium* agnoscit, quem ultimo meo Epigrammate designavi. Ego vero neminem nominavi, & in solum carminum istorum auctorem meum illud carmen conscripsi. Ego auctorem istum *Scurram litterarium* voco, quicumque sit iste, & suo, ut puto, merito: is *auctorem* esse se negat; *Scurram*, affirmat. Quae haec est argumentatio? ego sophisticam istam non capio, & tibi, *vir bone*, qui melius illam calles, universam cedo. Sed utcumque celare te cupias, & tecto, quanquam non incognito, in scenam prodeas nomine, imprudenti tamen *ἀνερσία & ἀβελία* prodidisti te turpiter. Vide quid in epistola tua nupera scripseris principio paginae quartae; cuius in aedibus fueris; quid ibi rei sit gestum, Aedes erant, ut ipse significas, Jani Broukhufii, amici, si tui, certe & mei: nam *iste*, quem tuum putas, potiore sane jure, & priore, *meus est*. una nobiscum tum aderat, J. Galleus, verbi divini Minister Campensis; quod non menineras, credo, aut damno tibi futurum non cogitabas. Teneo enim te, & quidem fortuis, quam ille Africam; teneo

ὡς ἀποδείξει; & testes huius habeo rei non unum aliquem, quem subterfugeres; sed duos, probatissimae fidei, & prisci candoris homines, qui veritati huic subsignare, & testimonio, si opus est, publico, adesse mihi non recusabunt. Iste ergo praeter hos quartus, ut tu dicis, *Valerius* quidam *Accinctus*; ut ego, *Jacobus* est *Perizonius*. Hic ergo *Accinctus Valerius*, vel *Jacobus* hic *Perizonius*, quo enim nomine appellari velit in posterum, nescio; hic *Valerius*, inquam, *Accinctus*, ita enim vocare nunc libet, donec suo se ipse appellaverit nomine, virulentam pro more suo scripsit Epistolam, qua mihi optat, ejus ipse maxime indiget, *bonam mentem*, in cuius sane ille *sacraria* penetravit nunquam: nam si vel micam bonae mentis haberet, nullos profecto versus conscriberet. Sed de facultate ejus Poetica, ut & de hac ipsa epistola, plura videbimus postea. Id unum de ea nunc dicam, nihil in ea leporis esse aut elegantiae, & fallis illius urbani, quo istiusmodi generis condiri scripta oportet; neque quicquam in ea conspici, praeter livorem & maledicentiam. Ei ergo epistolae miserabile quoddam praefixum est Epigramma, de meo confarcinatum, & infelici ~~παρρησια~~ transpositum, in quo praeter convitia caetera, *scurram* me *barbarum* vocat. Quoniam ego jure sim *barbarus*, & an non ipse sit potius barbariae nota insigniendus, qui me *barbarum* vocat, cum maxime non examinabimus. uter nostrum sit *scurra*, hoc est, uter scurriliter egerit, & *scurrae* potissimum titulo si honorandus, quoniam famae esse potior cura, quam doctrinae, debet, disceptare nunc tecum libet, *Valeri*, ut te vocas, *Accincte*. Quid agis autem, mi Franci? *validum* ac *valentem* adversarium vides, jam *accinctum*, jam paratum ad praelium, & ipso terrorem

no.

nomine circumferentem. mutatum est genus pugnae; inferior eris, succumbes; cede, fuge, & aliquas te in latebras abde.

O coelum! o terra! o maria Neptuni!
 quas latebras petam? quem me in sinum abscondam?
 venit, venit, & magno appropinquat passu

βαρυμάνις ἥρως,
 ἀνὴρ τελοῦ καὶ δακτύλου.
 πεινᾶντί γε μηδέ ποτ' ἄντης.

Noli, noli inquam, homini isti jejuno occurrere. Cave cave, τὸν Μαστιγοφόρον, τὸς Μαινόμενον τῶτον.

ἐντί γέ πικρὸς,
 καὶ οἱ αἰεὶ δερμῶα χαλὰ ποτὶ εἶνι καθήλαι.

At heustu, *mi homo*, ut tuum tibi reddam vocabulum, quem tu esse me putas? puerum, credo: te vero, ter-
 riculamentum, opinor, & μοιρολύκειον, aut malum
 quempiam Genium. Istud quidem postremum concess-
 ero lubens. Quid est αἰεροβολεῖν, si hoc non est? novum
 videre mihi videor Pyrgopolinicen. Teutobochi, aut
 Vercingetorigis adoptare nomen oportuit, si ipso ter-
 rorem nomine voluisses incutere. Quanquam & a-
 liud tibi nomen inducere potuisses, paullo speciosius.
 Poteras enim te *Physignatum* appellasse, σιγῆς ἔχον il-
 lum βασιλῆα, qui cum Achille hoc commune habebat,
 quod esset Pelei filius. Poteras & *Psicharpax* dici,
 ὁ τῶ Τρωζάρει. nec immerito. ut enim tu Criticorum &
 Grammatistarum omnium Princeps audis & Coryphae-
 us; ita hi Duces fuerunt & Antesignani totius βασι-
 λεύου. Sed extra risum & jocum: rem ipsam con-
 sideremus, & sine ampliore praeludio id quod agen-
 dum agamus. Statui ego, nihil tecum contendere ho-
 die: ad cavillationes tuas Grammaticales reponam
 ali-

aliquid brevi; ne istam me pugnam declinare existimes: ultimo, ad tuam tibi epistolam respondebo. Nunc, ut dixi, brevem ac simplicem rei gestae historiam concinnabo. Patere ergo, candide & nullo partium studio abrepte Lector, ut hujus tibi facti narrationem aperiā verbis, ut potero, quam paucissimis.

Cum, continuato per aliquot annos in Frisia cum collega bello, premi se ab eo videret *Valerius*, ita enim dici nunc amat, *Accinctus*, de alia sibi conditione circumspicere coepit. Non incongrua nec adspernanda ei provincia visa est Amstelodamensis professio. Tentavit id clanculum Noster per suos in id emissarios. cum res non procederet, neque augendus hujus urbis videretur numerus Professorius, alia occasione paullo post affulgente, relicta, quam oderat, Frisia, in Lugdunensem profectus est Academiam. Dum Amstelodamum interim, pro more, excurrit, offendi hominem in Bibliopolio Wetsteniano. Sermo inter alia fuit de hoc ipso negotio. Dixi, mihi non placere istas supplantationes; neque pro amicitiae jure factum videri. Ille negare rem factam, ut solet scilicet, nec quicquam se molitum fuisse sanctissimis mihi verbis asseverare. si alius id fecisset, se inscio factum esse. Credidi ego tum homini, & istam à me suspicionem amoliturum me esse respondi. Quanquam cui credibile videatur, id ipsum aliquem ausurum fuisse, eo prorsus ignaro, ad quem res ista potissimum pertineret; Post paucos deinde dies, cum clarissimo Graevio, & amicis plusculis aliis, in aedibus fuimus Jani Broukhufii, amici mei singularis. Edimus, bibimus, confabulamur; amicè geruntur omnia. Graevium ad navem deducimus;

mus : imus exspatium : in via occurrit Coetierius , Professor nunc Franequeranus , & in hujus illic substitutus locum . Quid multa ? totum huc diem fabulando transigimus . Forte ad manum tum mihi erant quaedam discipulorum meorum exercitia publica , versus quidam Latini , & orationes duae Graecanicae . offero tria exemplaria Coetierio , duo Perizonio (*Accincto* volui dicere) cum hac excusatione , me plura nunc non habere : ipsum esse in vicinia , nam jam Leidam erat vocatus ; plura me missurum , si vellet ; hominem peregrinum illum alterum esse . Ludo peracto , discedimus . Quis non in solidam cum isto me homine rediisse gratiam putet ? ita certe credebatur Janus Broukhufius , & , qui aderat una , Henricus Wetstenius . Aliquid mali ulceris remansit in malo pectore . Post pauculos enim dies , cum ad Janum venisset Broukhufius , & nescio quid de me murmurare inciperet denuo , mirari se dixit Broukhufius , quod sic erga me esset affectus , amicus jam factus , ut putabat , meus . Neutiquam , vero ; at ille . Quid ita ? subdit alter . Non vidisti , inquit , (nota rem , quaeso , ridiculam , ac penitus puerilem , quisquis es , bone Lector , & ab hoc uno exemplo ingenium hominis animadverte) non vidisti , (arripite aures , Pamphilli , rem enim notabilem audietis) cum traderet nobis nuper discipulorum suorum exemplaria quaedam , tria dedisse Coetierio , mihi duo ?

Spectatum admissi risum teneatis amici ?

Risit certe Broukhufius , & rem istam valde sibi videri ridiculam affirmavit . Subiratus respondit *ὁπάρου* , *Tu , si Hic esses , aliter sentias* . Quid videtur Lectores ? Eos ipsos appello , qui huic maxime homini favent . Postquam haec ita , ut exposui , gesta essent , & male

B

ex

ex illo animatus erga me esset *Accinctus*, accessit alterum quiddam, ex occasione, quod facem huic admovit incendio. Nam cum ad Stationem Leidensem vocatus jam esset *Valerius*, orationi ejus inaugurali carmen quoddam Graecanicum quidam addidit juvenis, qui, cum Latina & commoda terminatione *Jensius* dici posset, rudi tamen sono & aspero, sibi vero suavi prorsus ac jucundo, *Jens* appellari maluit hactenus, ut ex ipso statim nomine barbarum esse hominem appareret. Id uti a me conspectum est carmen, sua mihi pariter vitia praebeuit conspicienda, quae sane magno numero erant, & plane enormia. Ea amicis meis dixi & ostendi compluribus: Graevio inter alios & Broukhufio, quorum ille ad rem novam & invisitatam, & vix etiam, dum videret, credibilem, tamquam ad clypeum Persei, & monstrum quoddam Medusaeum, obstupuit plane ac dirigit; alter, nihil se novi videre, dixit. Hic fons mali, atque omnis exinde rixae & contentionis verisima scaturigo. Rumor iste interim spargitur, & Leidensium etiam Professorum aures implevit; percelluit propemodum dixeram; adeo nunc quoque omnem mihi penitus mentem malum istud eripit carmen. Post dies non ita multos vetus meus ad me hospes devenit Jacobus Gronovius. Is à me sciscitatur, num ego essem, qui tam multos in eo carmine naevos esse contenderem? ita, inquam. ubi illi essent? in carmine. ubi id esset? in cubiculo. videre se velle; recte, inquam; sed mihi non credis? suis id se oculis usurpare malle, respondit. abii, quaesivi, ostendi. Quid tum ille? nihil. prorsus nihil? nihil, inquam; nisi hoc unum; carminis istius auctorem istam sibi licentiam permissam existimare. Redit Leidam Gronovius: scribit epistolam.

lam Jensus; & ut suos sibi naevos ostenderem, obnixe rogat. Suspecta mihi ista fuit epistola: nihil respondeo. Ardescit illico juvenis, & parum aberat sane, quin telum suae in me lucubrationis strinxisset iste feroculus. Tam gnauiter militare discunt studiosi illi Leidenses. Quid mirum? *Valerios* habent *Accinctos* ad istam militiam Campidoctores. sed opportune hic ipse me admonet versus *Valerii* nostri *Accincti*, quem ex oculis paene amiseram, nam ut animo excidat, ubi nimis altas radices egit, non videtur metuendum magnopere. Is ergo, ut illius ad me collega, ad Janum inuisit Broukhufium. de mea intemperantia queritur; se notari potissimum; per Jensii latus se peti. Quasi vero aut nobis non integrum esset, nostram de istiusmodi scriptis sententiam ferre, & in nostro foro judicare; quod, extra territorium suum, in omnis aevi & generis scripta, sibi licitum ac concessum putat Censor iste ac Dictator perpetuus: aut magno illi ipsi honori ac gloriae foret, istorum se vitiorum, quorum tanta est copia, ne unum quidem suis conspiciere oculis valuisse. At vide constantiam hominis! qui primum Jano Broukhufio dixerat, se carmen id non legisse; postea ad eum reversus (nam saepe illo itabat, & de eadem plerumque materia, haec illum urebat scilicet, cum eodem sermones habebat) id cum Collega legisse se affirmavit; nec quicquam (*ὁ σοφιστὴν* hominis observa, Lector) in eo vitii deprehendisse. Aliam ejusdem peritiam animadvertite, quaeso. Eo usque dementiae venit & imprudentiae, ut horribile hoc secretum apud hunc eundem amicum meum deponeret; se in Poetarum, Graecorum praesertim, lectione, & legibus istis metricis, non ita esse versatum. Nihil horum invenerat, credo, in *litteris* suis *interio-*

ribus. idem apud alterum suum collegam, Burchardum Volderum, ut ille mihi narravit, cum Leidæ essem nuperius, non erubuit confiteri. Hic iste est Heros videlicet, qui omnes prae se barbares putat. Narro aliud quiddam, quod vix credibile videatur. Eidem Jano Broukhussio, cum miraretur inscitiam hominis, harum illum rerum plane ignarum esse, quae prima sunt fundamenta litterarum nostrarum, & in metricas leges peccare eum, qui publice Eloquentiam profiteretur, respondit, id sibi vitio verti non posse, & (notate impudentiam hominis) *Eloquentiae Professor ista ut tam exacte intelligat, opus non esse.* Hic est *Validus* iste *Valerius*, qui caeteros homines fungos putat. leges metricas ignorabit Eloquentiae Professor? miror non & addidisse, Grammaticas. sed aliter videlicet ipsum *litterae illae reconditae* docebant suae. Quid dicis, quicumque haec legis? Credis? an confictum a Poëtis existimas? Magna est Poetarum licentia, non tanta tamen, ut in soluta illis oratione mentiri liceat. *Valeriorum* id est, & *Accinctorum*; neque istam nos gloriam affectamus. Vides, opinor, Lector, insignem audaciam hominis, pari cum ignorantia impudentiaque conjunctam: nec sine mente eum esse tantummodo, sed & sine fronte, & veteri illi Domitio similem Ahenobarbo, de quo se non mirari dicebat Licinius Crassus, *quod aeneam haberet barbam, cui cor plumbeum esset, os ferreum.* Quin ad carmen istud Graecanicum, & ista, quae dixeram, vitia, redibat denuo, & ut ostenderem illa, si possem, flagitabat: quasi non ostendissem Collegae; aut ille id ei non significasset. Sed quarebat videlicet homo litigiosus aliquam litigandi ansam: nec futurum, ut opinor, credebatur, aliquid videre me posse, quid ipse non

non viderat; aut nunc esse vitia, quae ille, ut insignes modo virtutes, fuerat admiratus. itaque instare ille continuo, & urgere, nec esse, quae dixeram, vitia, clamitare. Sunt tamen, quantum ego intelligo, inquit alter. Cur ergo id non ostendit? quia non amat lites. quia non potest, subjungit ille. ostendat, si vir est: si potest. Habitis hisce inter utrumque sermonibus, non sine clamore & jurgio, & acuta satis voce, ac *valida*, ex amici mei domo descessit *Valerius*, placido parum animo & quieto: ac, nisi cum milite res sibi fuisset, jam ad praelium, credo, se parasset *Accinctus*. Haec ego ex amico meo illo audivi plus semel: haec, pro indole animi mei, pacis potius & quietis amante, quam litis, ne ullo cum quoquam modo in publicam arenam descenderem, facturum me recusavi; cum ab eo ipso toties provocarer, qui nunc me *Provocatorem* appellat. Scio enim quam turpe sit illud, & honesto viro indignum, nec nobis tantum, sed studiis nostris communibus, damnosum maxime, & nocivum, contentiones litterarias istas inter sese conferere homines litteratos, de rebus non magni momenti plarumque, vel nullius potius, & de caprina, ut dicitur, lana. Detestatus sum illud semper & execratus, quod non tam verbis, quam rebus, & toto vitae meae genere, probare videor posse. Hoc enim est primum scriptum Eristicum, quod unquam à me productum est: cum *Valerius* noster *Accinctus*, nihil fere aliud egerit toto septennio. Declinasse igitur lubentissime & hoc certamen, & declinavi sane tam diu, quam potui, immo ultra quam debui forte: sic ut amici mei crebris subinde sermonibus admonerent, ac suis quoque convitiis, amici tamen, proscinderent, & incitarent, ut infano

huic homini regerem vicissim aliquid, & *σδάλματα* car-
 minis istius omnia facerem manifesta. Quod si pri-
 ma statim vice factum à me fuisset, nihil illi contra
 hisciturum fuisse hunc blateronem existimant. Nec
 praeter verum fortasse, cum *animi mei lenitatem* illam,
 segnitiam ac pigritiam, imbecillitatem etiam & *αδυναμίαν*,
 fit interpretatus; quam falso, *perpetuam fore*, sibi pro-
 miserat. His ac similibus irritatus ab isto homine, ac
 provocatus injuriis, ne verbum quidem ullum reposui;
 aut carmen illud ipsum in lucem misi, cum annotatio-
 nibus brevibus, & simplici Veterum auctoritate, ut
 mei me monebant amici. Ille interim non cessare, lapi-
 dem omnem movere, telum circumspicere, donec Ora-
 tione illa sua in Reginae funere nupera, missile quoddam
 telum libravit, ac suam in me bilem evomuit. Ego rem
 tam indignam non ferens, & iusta, ut opinabar, in-
 dignatione commotus, neque tam meam causam agens,
 quam publicam, alio illum missili impetivi. Urebat
 hoc hominem plurimum. Aliud continuo in me telum
 contorsit; ego, vicissim aliud; donec, post plura hinc
 inde missa, nobilem illam tandem, ac praeclaram, con-
 scripsit Epistolam. Habes, Lector, simplicem facti
 narrationem, ut promiseram; uti & necessarium vi-
 debatur; quoniam hic in illud, ille in aliud rursum,
 meum aut illius, incidens scriptum, & aliquam tantum
 partem, eamque ultimam ferè, litigii huius nostri in-
 telligens, non recte satis de toto hoc nostro judicare
 negotio potest. Nunc probanda sunt ea, quae dixi, &
 confirmanda, ut certis indiciis & argumentis, ac rebus
 ipsis appareat, quid de utriusque nostrum ingenio, stu-
 diis, moribus, & his ipsis scriptis, fit sentiendum.
 E quibus, ut opinor, luce clarius apparebit; uter agref-
 sus

IA

fus sit alterum, & laceffiverit prior, uter scurriliter egerit, & honorabilem illum *scurrae* promeruerit titulum. Sed ad rem tandem, hoc est, veram & genuinam dissensionis hujus omnis materiam, veniamus, ac fomitem. Heus tu! cedo carmen Graecanicum. En illud ipsum.

ΕΥΦΗΜΙΑ

Κυδίτῳ καὶ εὐδοκμοτάτῳ Ἀνδρὶ

ΙΑΚΩΒΩ, ΠΕΡΙΖΩΝΙΩ,

Ἱστορίῳ, Ἑλλάδος Φωνῆς, καὶ Ευφραδίας ἐν τῇ τῶν
Βατάβων Ἀκαδημίᾳ Εξηγητῇ
ἀξιώτατα χειροτονηθέντι.

Ὡς ἀγαθὴ τύχη, ΛΟΥΓΔΟΥΝΟΥ κλυτὰ πόλιν
Μῶσαι τε καὶ χερσὶ δώματ' ἔχουσαι σοφῆς,
Τριμέτερον κλέει κόσμον τε ΠΕΡΙΖΩΝΙΔΗΝ
Νῦν κτὰ δὲ δέδοται κτᾶσιν εὐχευόμεν.
Πολλὰ κίς ἐν ΦΡΙΣΙΗΣ ΒΑΤΑΒΗΝ κικλήσκει ἐς αἶαν
Ἀνέροι, ὡς Μῦσῃν ὕμνῳ ἐσομένον.
Πολλὰ κίς ἐν ΦΡΙΣΙΟΥ ἀντεβόλησεν ἔρω.
Λυκαίς ΦΡΙΣΙΟΥ ἀντεβόλησεν ἔρω.
Ἀλλὰ τέλει πείθῃ, τόδε χ' ὑμῖν κρᾶνον ἐέλδωρ,
Καὶ διὰ ὕψος Νότος δέυρο κέλευθα κίεν.
Τόν δὲ Διὸς κῆραι Μῶσαι χάριτες τε γλυκεῖαι,
Χερσὶ τε καὶ ἱλαρῶ δεξιόσσαι θυμῷ,
Τριμέτερον ἐς ΛΕΙΔΑΝ ἄγεθε, ἢ ἐν μεγάροισιν
Ἰδρυοῦ, οἷς ναίει Τριτοβύνα σοφῇ.
Φῶς δ' ὅδε σὺν κροτέοις ἢ θαύμασιν εἰρονομῶν,
Θεατρικὸν βᾶναι σεμνοπρεπῶς ἐφ' ἑδῶ.

Εὐτὶ

Εἶτα λιγύφθογγόν τε ἢ ἡμερόφωνον αὐδῶ
 Γλῶσσα λυγρὸν ἀνθεῖν ῥήμασι θελξινόοις.
 Ῥώμη παγκρατέεσσα, ἢ Ἑλλάδ' ἢ Ἑλὰς Ἀβελῶν
 Ἀφθιτον ὀλογῆς κύδ' ἔχουσιν ἑῷ.
 Εὐδὲ ΠΕΡΙΖΩΝΙΔΗ, πῖς παραινέτα, πένθεϊς
 Σπεδάξεις τ' ἀνάγειν γρημμάα φθόγμω.
 Ἑλλαδικῆς τε καὶ Ῥωμαϊκῆς ἀσκήμαα γλώσσης
 Δεικνύεις κελύας ἔμμελαι πανσοφίης.
 Ἡ' μὲν Δία τοῖς Πειθῶ σομάτεσσιν ἐφίξει,
 Καὶ ψυγαγωγῆται δ' Ὀφραδίασιν ἑῷ.
 Μῶσα τε ἢ χαρίτες σε ἡμερόεσσαι δάπεδον.
 Κτυπέσιν ποσὶν οἷς γηδόμωαι χορηγοί.
 Ἡβη παλλαδικὴ ἀσπαζομένη σε περὶ πέμπῃ
 Οἰωνοῖσι καλοῖς, πᾶσα τε συγκροτέει.
 Καὶ μιν ἐγὼ θεράπων Μυσῶν, φοῖβοίω τ' ἀνακτ',
 Ερμῆς αὐτὸς ἐμῆς γηδοσύνης πέλομαι.
 Καίπερ εἴ μὴ Τειρεσίας, Κάλχας τ' ὄϊδ' εἰδῶς,
 Μαντεύεσθαι ὁμῶς νῦν φίλον ἐστὶν ἐμοί.
 Εκ τοι ἐγὼ, τίδε ἢ τετελεσμένον ἔσται, λυκαῖον
 ὦ ΒΑΤΑΒΟΝ, ἢ ἐνὶ βράλλεο σῆσι φρεσί.
 Ευλογίας φήμην δόξαν τε, σὺ ἴην ποτε εἶχες,
 Αρχαίω ὀφείσεις αἰψά παλιγγυμένη.
 Κοσμεῖται κρατὶς ἐπεὶ σε δυοῖν ζυγὸς ἀνδροῖν,
 Τῷ θεῷ τετθοῖσιν Παλλὰς ἔτραφεν ἐοῖς.
 Ἔστι δὲ ΓΡΩΝΟΒΙΟΣ, λαμπτὴρ σέο, ἢ μέγα φάσ,
 Ἄξι' ἰδμοσύνης κληρονόμ' πατρικῆς.
 Χ' ὅτερός ἐστι ΠΕΡΙΖΩΝΙΔΗΣ, ἐν μεγάροισι,
 Σοῖς μάλα τιμηθεῖς, ἢ γέρας ὀκλὸν ἔχων.
 Ἄνδρες δύο, σπαδῶν ΖΩΝΗ, ζυχθέντε ὁμοῖων,
 Εὐνοίας τ' ἴσους σφίσιν ἀμειβομένη,
 Ἄνδρες δύο τέττω, ΒΑΤΑΒΟΝ μέγα χαῖρε λυκαῖον
 Κολληθέντε φίλον δῆμονίησι θυμῶν.
 Ἑλλαδικῆς τε ἢ Ῥωμαϊκῆς κοσμήτορε, κ' ἐοθλῷ
 Εξηγητὰ καλῆς ἐσομένη σοφίης.

ΙΩΑΝΝΗΣ ΙΗΝΣΙΟΣ.

Hoc

Hoc est nobile illud carmen, quod tantas tragaedias concitavit. Liberum unicuique scribere poetae quod velit, & eo carminis genere, quod ipsi placuerit maxime; ea etiam lingua, quam amaverit plurimum. Hic autem, qui crebra jam Heroica scripserat, multas praeterea Elegias, nonnullas etiam odas, & quaedam insuper Epigrammata, ut nihil non posse videretur, & utramque se callere linguam ostenderet, voluit etiam Graecae suae Poeseos facere experimentum, ne quicquam mihi proprium relinqueret scilicet; simul ut omnibus faceret palam, Leidae etiamnum superesse *Danielem Heinsium*: quem cum ego versibus meis Graecanicis imitari tentassem, idem & ille facere studuit. Quae in eo est culpa? nulla: nigri livoris & inanis gloriolae aliquantulum tamen; sed illud non culpo; laudo etiam, & juvare hominem vellem, si possem; adjuvi etiam, & *viam* illi monstravi, *qua iretur ad carmen*. Nam cum ad aedes meas veniret aliquando, bono an malo animo, nescio, ut apparet, malo; & de studio nobis Poëtico sermo esset; rogavi, quos libros legeret, nam id me videre non posse; respondit, omnes; antiquos & recentiores; nunc hos, nunc illos; recte id quidem, inquam ego. Nunc Sannazarium penes me habeo, subdit ille; tum Barlaeum legam; deinde, Johannem Secundum. Huius inquam, quid agis? tu coelum terrae misces, bonos cum malis confundis. De primo & tertio non male fortasse: de altero illo, non sum auctor ut legas. Primum legendi sunt Veteres, deinde Recentiores, quorum virtutes videre non possumus, nisi in Antiquorum lectione versati fuerimus aliquamdiu. Quod magis sincerum ac proficuum dare illi consilium potuissem, si vel pater fuissem, vel frater, vel, quod tum eram, magister? Quam

C

deinde

deinde tibi gratiam retulit? magnam se relaturum promisit. quam retulit? rogo. nullam, malam, pessimam. Nam domum reversus, omne id nostrum colloquium (nam & plura fuerant alia, quae non hujus sunt loci) narravit aliter multo, quam fuerat inter nos habitum, & pejorem quidem in partem. Redeo ad carmen Graecanicum, in quo sive me iste, seu Danielem imitari voluit Heinsum, scire ex eo potuit, si Graeca illius legisset Poëmata, aliter ipsum fecisse: discere etiam potuit ab eodem, & ex praefixa iisdem illis Poematibus Praefatione, aliter fieri oportere. Sed ipsa tandem carminis illius vitia videamus.

I. *ὅς ἀγαθὴ τύχη*) Producit, ut vides Lector, primam in *τύχη*, in qua falsum eum fuisse existimo. Brevem, esse scio; longam, nescio. Videatur *εἰς τὴν τύχην* Titulus; Anthologiae libro primo, ubi plura se ostendent exempla, & hoc inter alia:

Παύρος ἐν εἰς τύχης μερόπων βίῳ.
II. *Κλυτὰ πάλη* *ῥώματα*) primam in *κλυτὸς* hic noster producit, Homerus corripit.

— *κλυτὸς ἔννεσίγαι*,
— *ἀπὸ κλυτὰ τεύχεα δῦσαι.*

& alibi passim.

III. *Μῆσαι τε καὶ χαλκίαι*) τὸ αἰ corripit ὁ ποιητής: ita enim ipse se vocat, dum Bruxellanas ruinas contemplatur, Poeta. Scio illud commune esse, & nunc ab Homero produci, nunc corripit; sed sequente vocali, ne erres, ὁ bone. unquam vero brevem esse diphthongum aut istam aut aliam, apud ullos bonos scriptores, consona subsequente, non memini me legisse, nec aliquod adduci posse exemplum existimo. idem tamen vitium in uno & eodem carmine committit decies, ut in hujus ipsius versiculi altero membro,

— *δῶμαί' ἔχουσαι σοφῆς.*

V.

IV. Ὑμέτερον ἡλεῖ(Θ) κόσμον τε Περικλῆν(δην) observa, Lector, versum numerosum & suavem, ne te praetercat quicquam, neque expers sis suavitatis istius Poëticae, quam amabat tantopore Atticus, Scio spondaicos saepe versus in optimerum Poëtarum scriptis occurrere, sed studio id fit apud eos, & non sine magno judicio, & certa quadam ratione. nunquam casu, aut inopia, ut hic fecit misellus. Plura produci possent exempla, & infinita, si id nunc agere vellent. Scio liberiolem apud Graecos esse licentiam, sed nobis non facile, & cum judicio, imitandam.

V. Κικλήσκε(ν) quod an sit κικλήσκε(ν) an κικλήσκε(ν) non apparet, propter apostrophum. obscurum itaque est, & in telligi nequit. Prius illud esse non potest, nam κικλήσκε(ν) est *vocavit*; quomodo Homerus Iliados Α, de Hectore,

ἀμυνδὶς κικλήσκε(ν) πάντας δούλους.
convocavit extemplo omnes ad concionem Principes. κικλήσκε(ν) vero est *vocavistis*, quem sensum requirit hoc loco id verbi. Musas enim alloquitur auctor, quas felices praedicat, ac fortunatas, quod nunc habeant (pro misello illo Morione scilicet) *nobilem illam & desideratam tantopere possessionem*, κτᾶσιν (ita mavult quam κτῆσιν) εὐχόμενῃν, Perizonium nempe, *quem virum* (subjungit enim τὸ ἀνέρε(ν)) *ex Frisia in Bataviam saepius vocavistis*. Jam vero si eo sensu usurpat, quo accipi necessario debet, ajo Grammaticum eum mendum commississe plus quam pudendum. κικλήσκε(ν) verbum Poeticum est, & idem notat, quod καλέω. habet autem in praeterito ordine naturali κεκλήσκα, ut κεκάληκα, πεποήκα, quod Poetico more, abjecto augmento, est κήλησκα. Ignosce mihi, *Valeri Accincte*, si in *interiores* descendam *litteras* tuas, qui harum rerum nullam intelligentiam habeo, qui non amo,

nisi solos ingenii foetus, illos vero eruditionis odio habeo; qui non nisi mediocre carmen, & miseram subinde orationem compono; ignosce, o to, mi Valeri, ignosce; & tu una cum illo, bone Lector, si patientia tua abutor, & hisce te nugis detineo, quas tu mecum perpende, quaeso, paullo diligentius. Hoc sensu ergo το κίλησκα apud Homerum Ilidos B.

Κίλησκειν δὲ γέροντας ὄφισσας παναρχαίων.

vocavit vero (Agamemnon sc.) *Seniores & Principes Graecorum*. Illud vero in secunda plurali habet non κίλησκατε, ut hic est scriptum, sed κίλησκατε, ut τετυφώκατε, περιούκατε. quo modo si scripsisset, res aperta fuisset, etiam cum apostropho. Addo κίλησκει pro κίλησκετο, esse tertiam singularem à κίλησκειν, illud vero κίλησκατ', quomodo scribi debuit, pro κίλησκατε, secunda est pluralis a Praeterito Indicativo, κίλησκα. Haec ignorat videlicet ille, qui, nihil ignorare se putat; ὁ γραμματικός! ὁ πάνσοφος; hunc errorum committit ille, qui eundem illum in suis sceptra Paedagogico vindicaret pueris Magistellus; haec ego docere vos debeo, qui nullos libros edo, nullas notas conscribo, & ad stud. i nunquam severiora digredior. Sed de his, & pluribus aliis, videbimus Epistola Tertia. Quid ais, *Accincte?* putas me notulas scribere posse? haec enim docta sunt & erudita, & ex litteris tuis deprompta interioribus. Quid ais? credis haec me facere posse? credis, nisi mihi blandior, credis; quod & ostendam tibi fortasse aliquando. Scio quid dicturi sint Heroes nostri, & si nesciant, suggeram. Vitium esse typographicum clamabunt illico. Euge! bene! recte!

Sic excusari crimina posse puto.

E media se Charybdi extricarent homines isti. Sed, antequam hinc discedam, audi *Poeta*, audi. Quod in hoc ipso

ipſo verſu praecedit, & quod per illud tuum *ποικίλεις*, in ſequenti iterum verſu repetitum, nobis obtrudere vis, tu *ἀνέστης* vocabis Poeticam; ego, mendacium ſplendidum; tantum enim abeſt ut ſaepe ſit Leidam vocatus (ob inſignem, puto, eruditionem, & *litteras illas reconditas*) *Accinctus* hic noſter *Valerius*, ut ne ſemel quidem ego vocatum dicam, vel ſummum ſemel. *Tentatum*, ut dicitur, audio, an miſſis à Curatoribus litteris *vocatus* ſit autem & *appellatus*, nec ſcio, nec ſcire deſidero. ſufficit, verum eſſe, non *ſaepe* eum illò vocatum fuiſſe.

VI. In diſtichi huius pentametro aliud obſervo mendum. eſt enim ibi — *ὡς μύτην ὑμῖν ἐεσόμενον. ἐσόμενον*, & conſueta Poetis litterarum geminatione, *ἐεσόμενον* dici novi, *ἐεσόμενον* vero dici, oſtendat ille qui ſcripſit, aut pro illo *Valerius*, qui multò eſt illo *valentior*. Sed & hoc fortasſe mendum eſt typographicum. Quin ab eo ſponte quoque & ſtudio eſſe potuit factum, littera una per ipſum, vel Syllaba, (id enim perinde) iſti vocabulo addita, ut ignorantiam ſuam oſtenderet, libet enim nunc cum *Valerio* loqui, *productiorem*.

VII. *καὶ μὴ πείθεδξ δύνατο*) Tria in tam pauculis vocibus qui latere crederet menda? latent tamen. primum τὸ *η* corripit, conſonante ſequenti, quod jam obſervatum: deinde, quaſi id ſuavius eſſet in *πείθεδξ*, quod multo etiamnum eſt durius, ob conſonas geminatas, & proximo loco praecedentes: poſtremo ſecundam in *δύνατο* longam facit, cum corripì debeat. Certe ita ſolet Homerus. *Iliad* r.

Ποιῶ δ' ἐ δύναμαι ἰδέειν κοσμήτορε λαῶν.

& eodem in libro idem:

**Αἶψ' ἔτις δύνατο τρωῶν, κλειῶν τ' ἐπικέρον
Δείξαι Ἀλεξάνδρον δε.*

C 3

Et

Et ita passim alibi semper. Sed melius, quam Homerus, fortasse id novit *Jensius*, ὁ ποιητής; qui novam nobis, ut spero, consarcinaturus est Profodiam Graecanicam.

VIII. Λυκαῖς Φελίς) Quis unquam primam in Λυκαῖς produxit, nisi hic ipse? adeo pervulgata etiam ignorat & protrita. Prima in λυκαῖ corripitur, ut in *Lupus* apud Latinos; & *Lycaon* apud utrosque. Unde ergo in λυκαῖον, longa ista futura est syllaba? brevis sane est apud Theocritum idyllio, nisi fallimur, primo;

ὧ πᾶν πᾶν, ἔστ' ἔος) κατ' ὥρεα μακρὰ Λυκαῖς
Εἴτε συγ' ἀμφιπολεῖς μέγα Μαιναλόν.

Et apud Virgilium in Bucolicis plus uno in loco, ut & in illo, huic plane simillimo, Ecloga decima.

Illum etiam lauri, &c.

*Pinifer illum etiam sola sub rupe jacentem
Maenalus, & gelidi fleverunt saxa Lycaei.*

Immo, quod mirabile est, in hoc ipso versu, idem ille, quam nunc producit, mox corripit; syllabam,

ὧ βάταθον.

Adeo omnia illi communia sunt, & tam insanum in modum deperit vetus illud, quod dicitur, πάντα κοινά. peculiare illi, credo, idolum est, κοινὸς Εὐρύς.

IX. Τόδε γ' ὑμῖν κείνῃ ἐέλωρε) Pudendum hic rursus in errorem incidit ac puerilem, & plus quam unum, heros hic noster Graecanicus. Primum, malim dicere ἕμμεν, quod magis Poëticum, & Poëticum tantum, quam ὑμῖν, quod prosam olet: quanquam & usum eo sciam Homerum plus semel, si genuina aliàs lectio est, quam nostri nobis exhibent libri. Sed leviusculum hoc, & non attigissem plane, nisi ut appareat Poëtae nostro, accuratius haud paullo & attentius ejus me carmen

men legisse, quam fecerat modò *Valerius*. Majoris multò momenti est vocula ei adjuncta τὸ κερῖνεν, quod quid sit nescio, nec apud Homerum, aut alium quempiam, legisse me unquam recordor. Κερῖνω est perficio, confectum reddo, proprie annuo, quod illi, qui rem aliquam se confecturos promittunt, capite inclinato annuere nobis solent. Est enim κερῖνω quasi κεραίνω, capite annuo, ἀκέρει, quod Poëtis idem ac κεφαλῇ. unde ex hoc ipso compositum ἐπικεραίνειν, per τῇ κεφαλῇ ἐπινύσσειν rectè exponit Hesychius. Ab eo igitur est κερῖνον Imperativo Medio, pro quo κερήνον Homerus, ut in illo plus semel repetito versu, *Iliados* A.

Τόδε μοι κερήνον ἐέλδωρ,
ut suum ibi orat Chryles Apollinem; Thetis, Jovem.
Apud eundem κερήναι pro κερῖναι *Iliad.* I. & sensu huic nostro simili plane τὸ κερήνατε *Oduss.* γ.

Κεραλιμῶς μοι, τέκνα φίλα, κερήνατ' ἐέλδωρ.
Verba sunt Nestoris ad liberos suos, ut Ulyssis haec ipsa denuo verba sunt, ad Nymphas fontanas, *Oduss.* P.

Τόδε μοι κερήνατ' ἐέλδωρ.
Quod si hoc verbo uti voluisset hoc loco, pro κερῖνεν, quod primam habet correptam, aut κερῖνεν dicere debuisset, ab ἐκραίνον Imperfecto, vel κερῖνεν, ab Aoristo primo, quod est ἐκέραινα, pro quo more suo Attici ἐκέρηνα, ἐκέρηνας, ἐκέρηνε (Crasse enim tecum agere debeo, Magistelle, nam uti cum Crete cretizandum, ita cum Grammaticis grammatizandum) illud autem, si augmentum abjicias, & τὸ ν in fine obsequentem vocalem adjungas, fit κερῖνεν, quomodo dici debuit, quod primam habet longam sua natura, ut vides, (nunc enim videre te credo) cum tuum istud κερῖνεν primam habeat brevem. Sed ista sunt levia, nec digna, quibus immorari oporteat, & vitium est

est typographicum forte: nam eo continuo devolvetur. & pulchrum sane habet praetextum Magister, omnia excusandi. quod si pueri ejus perspectum haberent, & cognitum, vel una illi sufficeret ferula per omnem vitam.

X. Τὸνδε, Διὸς κούραι, Μῦσαι, Χάριτες τε γλυκεραί) ita distinguere hic debuit versus. Musas enim alloquitur, & ἀγεσθε est in hexametro proximo. Subobscurus est aliàs locus, nec an *duxerunt*, an *ducite*, sit intelligendum, in eo quod sequitur, satis apparere liquide potest.

XI. Ἰλαρῶν δεξιόσσαι θυμῶν.) Quis primam in θυμὸς unquam corripuit? facit id tamen, & suo, ut putat, jure, ὁ ποιητής. Aliter plane Homerus ποιητὴς ὁ μέγας, aquid quem milles occurrit,

θυμὸς ἀγνώωρ,
θυμὸν ὀρίνειν,

& similes locutiones aliae, producta prima. ultimam in δεξιόσσαι corripit suo more, ut in ἔχχσαι versu secundo.

XII. φῶς δ' ὅδε) Nescias utrum de luce loquatur, an de homine. Homo recte *lux* appellatur, & *lumen*, ut *laus*, *honor*: quomodo dici posset, *hanc lucem*, hoc est, *insignem hunc* & *luminosum hominem*, *lumen Academiae Leidenensis*, *Saeculi Varronem*, aut *Rhemmium quendam Palaemonem*, *cathedram Professoriam conscensurum*. Sed tum φῶς τὸδε dicere debuit misellus, non φῶς ὅδε, quod non probaret Rhemmius iste Palaemon, & ferula plecteret. Male vertis, exclamat *Magister noster*, vel *noster Magister*, (quo enim modo debeat dici, ex *litteris suis interioribus* explicabit nobis *Valerius*) φῶς enim & *lumen* notat & *virum*. Concedo, & nego. quo pacto te extricabis, Magister? si nosti, dicito: si nescis, ego pro te exponam, & ignorantiae tuae suppetias feram. duplex est differentia, tum in genere, tum in

ac-

accentu. φῶς cum circumflexo *lumen* notat, & neutrius est generis, τὸ φῶς. φῶς vero cum accentu gravi *virum* notat, & masculini est generis; vir enim masculus est; si rationem forte desideras. Itaque ὁ φῶς tum scribitur, non τὸ φῶς; quae & accentu & toto genere diversa sunt. quo sensu Homerus,

— αἰχότρελ' φῶς,
— ισόθε' φῶς.

Sed haec minutula sunt, neque quicquam horum reperies in *reconditis Valerii litteris*. Addo; post τὸ ἔδε comma necessario poni debuisse, respicit enim τὸ βάλει.

XIII. Σὺν κρότεσις καὶ θαύμασιν) *cum plausu & admiratione*, credo, voluit dicere. quid sit θαῦμα, scio; quid κρότεσι vel κρότεα, nescio. κρότ' est plausus, κροῖω, plaudo, unde illud in Comoediis, δότε κρότον. quo sensu Augustus (ut hoc te obiter doceam) cum jam morti proximus, circumstantes rogaret, *nunquid mimum vitae commodè transsegisset*, affirmantibus id ipsum amicis, δότε ἔν κρότον, inquit, ad hunc ipsum morem alludens. debebat ergo dicere noster, σὺν κρότοις non σὺν κρότεσις. Sed repugnabat Syllaba prima. quare nihil illi commodius visum est, quam unam addere litteram, & quidem familiarem illam sibi ῥὸ ε, quod pulchre sibi successisse animadverterat in ἑσθ' ὁ μόνον. ὁ lepidum caput! vel capita potius! illud vero, quod sequitur eodem in versu, ἐξορῶντων, quid sit monstri, ignoro. ego pro mea simplicitate vitium typographicum dicerem, pro ἐξορῶντων. Sed mysterium quoddam latet fortasse sub isto vocabulo, quod in defensione sua manifestum nobis faciet ex *litteris suis interioribus* noster *Valerius*.

XIV. Θεωρητὸν βάλει σεμνὸν γεγῶς ἐφ' ἔδ' (Θ.) θεωρητὸν ἔδ' appellat suggestum Professorium. qui si hoc nomine sit

D

ap-

appellandus, quid aliud sunt, qui in Theatro isto comparent, quam histriones? quid aliud hic ipse *Valerius*, quam *minus* & *histrion*? qui *histrioniam* tamen, & *gesticulatoriam*, *Mimos* omnes, & *Archimimos*, odisse videtur tantopere. aliter de hoc Catone loqui debueras, Magistelle, qui cum Catone illo antiquo hoc ipsum habet commune, quod non alium in finem veniat in theatrum, nisi ut inde discedat. Quod vero in eodem versu subiungit, non sine *magno paratu*, ἢ μὴ πολλῆς Φαντασίας, augustum illud ac reverendum σεμνοπρεπῶς, vim hujus vocis non percipit Magistellus. τὸ πρέπον enim quid sit ἢ τὸ σεμνοπρεπές non magis intelligit *Poëta Jensus*, quam *Orator Valerius*.

XV. Εἴτα λιγύφθογον τε ἢ &c.) Quid sit τὸ λιγύφθογον, τὸ ἰμερόφωνον, τὸ θελξίνον, aequè capit ille qui scripsit, quam de quo scriptum est. Neuter enim de his fando audivit quicquam. Tale vero aliquid ab hoc Oratore factum esse, tam falsum est, quam quod falsissimum. Ipse ille Orator, minus mendax hac in re, quam Poëta, in loco mox allegando, nullam in se vocis gratiam, nullam vim persuadendi agnoscit. In eodem hoc Disticho, an λύειν φωνήν Graecum sit, dubito, *solvere vocem*, pro *vocem emittere*: item, an γλῶσσα rectè dici possit ἀνθεῖν ῥήμασι, *florere verbis*, ambigo sane. Mirus est iste Hellenismus. Sed levìa ista, prae illo quod dicam, habeo enim hic hominem iterum in pudendo & turpi errore, & manifesta ignorantia deprehensum. Dicit oratorem hunc emisisse (id enim tibi nunc largior, & ex mala tua locutione bonam facio) ἰμερόφωνον αὐδῆν. in quo contra leges metricas peccavit rursus insigniter. αὐδῆ vox est Poëtica, ab αὐδάω, & idem quod φωνή, est autem vel bisyllaba ista vocula, ut apud Hom. Iliad. Δ.

ἐχεν

Et Iliad. N:

ἔχοντι ἐν στήθεσσι αὐδὴν.
ἐπεὶ ἔκτατο ἀλκυονίδην,
Velest trisyllaba per diaeresin, ut sit αὐδὴ pro αὐδῇ. Id cum sit, diphthongo in duas simplices resoluta, è quibus coaluerat, necessario, & natura sua, secunda in αὐδῇ brevis est, quam hic novo exemplo longam facit ὁ ποιητής. Adde quod per diphthongum semper scribitur hoc apud Homerum vocabulum, & disyllabum est, & nunquam, aut raro, apud ullos, aliter invenitur. At licet diphthongum resolvere. Non repugno magnopere, quanquam id prudenter & caute faciendum existimem, idque in vocibus ita jam usurpatis. Sed tum longam facere syllabam, quae per se est brevis, id vero non licet. Quod si è Graecis non observaverat, è Latinis certe discere potuisset, & velle ex isto satis omnibus cognito Tibulli loco:

Stamina non ulli dissoluenda Deo.

Idem tamen mendum commisit & versu quarto. (quod tum indictum praeiterii, ne bis idem dicerem) in voce εὐχομένην pro εὐχομένην, quod respuebat lex metrica, ubi itidem τὸ υ̅ producit, quod corripitur, & in hoc quoque loco corripitur debet. Alia res est in εὐζωνῶ, εὐκλίμενῶ, εὐφρονέω, & similibus, ubi geminatae sunt litterae, quae τὸ υ̅, brevem alias litteram, longam faciunt; quod hic locum non habet: δ enim & χ, simplices litterae sunt, nec praecedentem brevem producere Syllabam possunt. Vides magnum Heroa, Lector, cui in hoc cum Valerio convenit, quod in Metricis legibus sit versatissimus.

XVI. Πῶμιν πανκρατεῖσα, καὶ ἐκείνη ἑλὼς Ἀθήνας) versus non malus,

D 2

Ne-

*Neque enim benedicta maligne
Detrectare meum est.*

Sed aliunde, ex Anthologia nempe Graecanica, de-
sumptus totus.

XVII. Εὐθὺς περὶ ζωνίδη, πρὸς παρανετὰ) Versus admodum
numerosus, & dignus Poëta nostro, quem *sine rivali*
amare securus possit. dicit porro, πένθεϊς,

Σπασδαίσεις τ' ἀνάγειν γράμματα φθγόμενα.
non satis concinna haec sunt, & ἀσύστατα. *dolere litteras* an
commode satis dicatur, nescio. *revocare litteras* rectum
est. Sed cum *litteras fugitivas*, γράμματα φθγόμενα, eum
dolere dicit, & revocare, quam gratus erga Magistrum
discipulus est, qui eo vivo & praesente, ac litteras profi-
tente, *aufugisse litteras* dicit!

XVIII. Εὐλαδικῆς τε καὶ Ῥωμαϊκῆς ἀσκήματα γλώσσης) Idem
committit vitium in τῷ καὶ quod commiserat supra, &
quod versu deinde penultimo repetit, tanquam eximium
aliquem, & auribus non ingratum sonum.

XIX. Δεικνύεις κρήνας) Novum hic errorem errat, &
minus etiam excusabilem, quam erraverat modò, secun-
dam enim in δεικνύεις producit, nulla consona, multo mi-
nus duplici aliqua littera, subsequente, ignorans videli-
cet Prosodiae regulam primam: *Vocalis ante vocalem*
brevis est. Haec ego illum docere debeo scilicet, qui
alios docet. Quid ad haec dicent discipuli tui, Magister?
Quoniam tamen auctoritatem quoque desideras forte,
nec sola tibi sufficit ratio, en illam tibi: Iliad. I.

Τὸ καὶ δεικνύμενον πρὸς τὴν πόδα ὡς Ἀχιλλεύς.
Et apud Moschum, in Europa;

καὶ οἱ πλατὺ δεικνύει νῶτον.
τὸ ἔμμεναι ultimam apud hunc brevem habet, ut δέξαδς,
&c. nec quicquam moratur consonantem sequentem.

XX.

XX. Ἡ' μὲν διὰ τοῖς πειθῶ σωματέσιν ἐφίξει) Si de Platone, aut Cicerone verba fecisset, recte omnino, & vere, dixisset. Nunc ex hoc, ut & sequenti, apparet, quam nusquam observent τὸ πρέπον juvenuli isti, & omnia in majus exaggerent. In blaesi hominis labiis federet Pitho! ἀποπα ταῦτα πάντα ἢ ἀπερσδιόνυζα. in sequenti versiculo pro δ' φραδίαισιν ἐαῖς, malim ego ἀφραδίησιν ἐαῖς, quod paullo est suavius.

XXI. μέσαι τε ἢ χάρτες) & hic, & in altero membro ejusdem versiculi, σκιμερόεσσαι χορηγοί, τὸ αἰ bis iterum corripit, ut jam saepius dictum est. Partem item ejusdem hic versus repetit, quo usus fuerat in principio, adeo dulcis haec illi, & ingeniosa quoque, est repetitio.

XXII. κτυπέσιν ποσσὶν οἷς γηδέμεναι δάπεδον.) Infame hic rursus est mendum in primo vocabulo, cujus syllabam primam, natura & auctoritate veterum brevem, contra omnem legem metricam, longam facit. prima in κτύπῳ brevis est. Hom. Iliad. κ,

Ἰσπῶν μ' ὠκυπόδων ἀμφὶ κτύπῳ ἔατα βάλλει.

Quem in ore versum habuit jam jam animam efflaturus Nero. Item in κλυπέω. Iliados N,

Παννύχιῳ δέ σφιν κακὰ μέγ' ἐτο μὴνέτα Ζῶς,
Σμερδαλέα κτυπέων.

Vide quam diligenter Poetas legerit ὁ ποιητής. quem tamen, Poetices Professore in Academia Lugdunensi facere voluere nescio qui.

XXIII. καί μιν ἐγὼ θεράπων Μελῶν, Φοίβοιο τ' ἀνακλῖ) τό μιν vel αὐτὴν significat, vel αὐτὸν. neutrum hic locum habet; nec video, quo referri possit. μὲν dicere debuit, non μιν, & tum aliter accentus erat ponendus, ἢ μὲν: sic ut in manifesta sit rursus culpa, quocunque se vertat. deinde post ἐγὼ poni necessario debuit comma, respicit enim τὸ πέλομαι. Cum vero se Musarum ac Phoebi sacerdotem

dicit, imitari, credo, Ovidium, voluit,

Ille ego Musarum putus, Phoebique sacerdos.

Vide quam sibi placeat juvenis, qui se Musarum sacerdotem putat. ego certe laudarem fortunas Apollinis, si istiusmodi sacerdotes haberet.

XXIV. Καίπερ ἐὼ μὴ Τειρεσίας &c.) quid hoc velit, nescio. ἐὼ est *sino*, quod hic non quadrat. Vult dicere, opinor, *quamvis non sim Tiresias &c. tamen vaticinabor.* id autem non video in istis verbis. ἐγὼ forte voluit dicere, intellecto τῷ εἰπὶ: vel ἐὼν etiam, sed non convenit cum τῷ εἰπὶ, nisi absolute intelligatur, quod duriusculum. an voluit illud, quod est apud Homerum (adjuvandus est enim homo) Iliade prima,

καὶ τὰρ ἐπεὶ χέρεος ἀντιχέειν ἔπαυσατο, ὅφρα μὴ ὄνῃ
ἀγγεῖον ἀγγέαςθαι ἐὼ;

Circumspicite mihi aliud praemium, inquit, ne solus sine praemio sim. Illud autem ἐὼ subiectivus est pro αἶ, concessa poetis licentia. Cujus loci imitatione dicere debuit ἐὼ non ἐὼν, accentu in prima, non in ultima, posito, & circumflexo praeterea in acutum mutato. Vide, quam minuta & levia docere debeam doctorem istum. Sed recurret ad anchoram sacram, & vitium esse typographicum clamitabit. At tu, o noster, accuratior paullo in accentibus esse debueras, in illis praesertim, a quibus totius rei sensus dependet, quod exemplis probari pluribus posset, si isto res patrocinio indigeret. In eodem versu est, Καλχῆος τ' ὅς ἐστι δῶς. hemistichium numerosum: nescio enim quam suavitatem habent versus isti spondaici, nullo iudicio positi. Calchas Homero dicitur ὅς ἐστι δῶς, peculiari epitheto; sed quo modo? in principio versus, an in fine? Videamus istum eloquentiae non minus quam sapientiae fontem Iliad. A.

— αἰμυρ

Εὐ εἰδὼς ἀγόμενος θεοῦ περὶ πείρας ἑκάτοιο.
 ἄμμι δὲ μόντις

Vides pulchrum versum & numerosum, & in principio versus positum illud εὐ εἰδὼς, non in fine, quod durum, & horridum.

XXV. Ἐκ ταῖ ἐρωῶ, τόδε ἢ τετελεσμένον ἔσαι &c.) Hic versus, ut & ille qui sequitur, bonus est; & bene Graecus; uterque quippe ex Homero desumptus; ita enim apud eum ad matrem suam Achilles.

Ἄλλο δὲ τοι ἔρεω, σὺ δ' ἐνὶ φρεσὶ βαίλεις σῆσι.

Et ad ipsum Achillem eodem in libro Pallas:

Ὡς δὲ γὰρ ἐξερέω· τὸ δὲ ἢ τετελεσμένον ἔσαι.

En furem manifestarium: furari enim id est; non, imitari. sed eam differentiam non intelligunt Poëtae Leidenses; συνόνυμα τέταρτα ταῦτα ἢ ἰσοδυναμούντα. Τὸ αὖτε praeterea in ἔσαι hic iterum corripit (ne quid praeteream in tam nobili scripto) ut jam saepius vidimus. Primam autem in Λύκαον recte hic corripit, (ne sua eum laude fraudemus) ut in superiori hoc ipsum loco male produxerat. Hos igitur duos versus Homero sublegit, in quibus nullam plane discrimen; nisi quod ex bonis fecerit malos. Quod in proximo sequitur versu

ἢ ἐνὶ βαίλεις σῆσι φρεσὶ,

nullam habet connexionem cum praecedenti. dicendum erat: σὺ δ' ἐνὶ.

XXIV. Ἐπλογίας φήμην &c.) dicit *Veterem Eloquentiae famam & gloriam, si quam habuerit olim Leida, cum hoc homine reducturam*: cum ad nullam rem minus idoneus sit, ac minus valeat noster *Valerius*, quam ad eloquentiam. fatentur id ejus tum orationes tum carmina, ne convitium sibi dictum existimet. Aliter laudari potuisset ὁ πᾶν, si judicium habuisset ὁ ποιητής. Sed amant videlicet illud, quod non intelligunt. tanta est vis eloquen-

quentiae & efficacia: illud autem comma, non post τε, sed post σὺ, debuit collocari.

XXII. Ἀρχαίην ὁράσεις) Secunda in ὁράσεις longa est, apud bonos scriptores; apud hunc brevis. qua id auctoritate factum sit, nescio. Aliter certe Homerus Il. A.

Κήδεο γὰρ Δαναῶν, ὅτι εἴθ' Ὀνήσκοντες ὄρετο.

Idem Iliad. Ω.

ὄχυν σὺ γ' ἐπέλα κελαινεφέ Κρονίωνι

Ἰδάλῳ, ὅς τε Τροίην καὶ πᾶσαν ὄρεται.

λόσεις dicere potuisset, verbo non minus Poëtico. sed haec, ut plura alia, ignorat Poeta noster Graecanicus.

XXVIII. Κοσμεῖται κέρτις ἐπεί σε δυοῖν ζυγὸς ἀνδρῶν) primum τὸ κοσμεῖται, significatione activā, pro κοσμεῖ, τῷ σε adjuncto praefertim, non multum mihi placet, & insolens plane videtur, ac novum. Sed est aliud quiddam, quod te volo, ὦ ἄρσε. Nostine primam in κέρτις brevem esse, ut in κέρτ; & per metathesin κάρτις dicere solere Poëtas, ut huic malo succurrant, & è brevi longam faciant? Vide, quam multa docere te debeam, & quam tenuia. Homerus de Jove.

τὴ γὰρ κέρτ ἐσι μέγιστον.

Idem alibi,

κράτερ' ἄλγεα πάχων.

Et in illo vulgato,

κατὰ κράτερός ὕσμινας.

Idem Il. A.

Κάρτιστοι μὲν ἔσαν, καὶ κάρτισσις ἐμάχοντο.

Et Iliad. Θ,

ὅσον εἰμὶ θεῶν κάρτις ἀπαινίων.

Vides pudendum mendum, Magister, virga, non ferula, dignum. non minus magnum est in sequenti versu, ne defunctum te putes:

XXIX. Τὼ θεὰ τεῖθοισιν παλλὰς ἔτρεφεν ἑοῖς.

ubi & à quo unquam secunda in ἔτρεφεν est producta?
prima

prima in τρέφω, τρέφειν, τρέφειν pro ἔτρεφεν, semper corripitur. Iliad. E,

Ἐτρεφέτην ὑπὸ μητρὶ βαθείης τρέφειν ὕλην.

Et in citato modo loco Iliad. A. ubi geminum hunc in uno & eodem versu errorem conspicias, Magistelle:

Κάρις δὲ καὶ κείνοι ἐπαχθονίων τρέφειν ἀνδρῶν.

Vides, ὦ miselle, quam multa, quam magna, & vel pueris tuis indigna, in duobus hisce versibus commiseris vitia.

XXXI. Nondum te demitto, est etenim alius item in hoc versu naevus. ultimam in θεᾶ, corripis. quo jure; inquam; qua auctoritate? Aliter certe Homerus, & quidem principio operis: Μῆνιν εἶδε, θεᾶ, nosti quod sequitur. & Eodem in libro, ubi & superius mendum conspicias denuo: Εἰ δὲ σὺ καρτερός ἐσσι, θεᾶ δὲ σε γαίης μήτηρ.

Id. ibid.

ἀλλὰ σὺ τάνη' ἐλθέσσι, θεᾶ, ὑπερίστας δεσμῶν.

Quid dicis, Magister? pudet me tui, pudet.

XXXII. Λαμπτήρ σεο, ἢ μέγα φῶς. Hoc vero est turpissimum mendorum omnium mendum. τὸ φῶς, ut supra dixi, est *lumen*. illud vero resolvitur a Poëtis in φῶς, quod suavius & numerosius. Una vero longa duas facit breves, ubi resolvitur. Adde quod vocalis ante vocalem semper est brevis, ut ostendimus supra in δεικνύεις. adde denique veterum auctoritatem, & centies apud Homerum repetitum ab eodem illud:

λαμπρὸν φῶς ἠελίοιο.

En tria, non in duobus, ut modo, versibus, sed in una & eadem vocula, vitia. Jam bis ad eundem lapidem offendisti, τὸ φῶς dicendo, pro ὁ φῶς, nunc vero primam in φῶς producendo. cum ob triplicem, ut ostendi, rationem corripì debeat? caecutis, credo, ad lucem istam; immo in luce, & ad splendorem tam manifestum habetes

E

betes

betes plane sunt oculi tui, nec quicquam vident.

XXXII. *χ' ὅτιρός ἐστι περιζωνίδης*) durus iterum versus, & auctore dignus. Cur homo hic versus facit, & quidem Graecos, qui nec quantitatem Syllabicam, nec ullam metri suavitatem intelligit?

XXXIV. *Ἄνδρες δύνω, σπεδῶν ζώνη ζώχθεντε ὁμοίων,*) putida allusio ad nomen Perizonii quod à *περι* & *ζώνη*. *Accinctum* Latini dicerent.

XXXV. *Σφίσιν ἀμειβομένω,*) prima in *σφίσιν* brevis est. Homer. Iliad. A.

Καὶ τὰ μὲν ὧ δάσαντο μετὰ σφίσιν ἦες Ἀχαιῶν,

Et ita passim.

XXXV. *Κοχλιδέντα φίλον ἀεμονίχσι θυμῶν.*) Iterum turpis naevus est in hoc versu, corripit enim primam in *θυμῶν*, ut supra fecerat in *θυμῶ*. idem est mendum, dices. ideo ne minus est mendum? responde, quaeso. Sed tibi fortasse licet, quod in pueris tuis plectendum foret.

XXXVI. *Ἑλαδίων τε καὶ Ῥωμαίων.*) quam haec suavia sunt! & quasi non sufficeret semel ista dixisse, iterum repetis, & rurtum aures obtundis sono illo asinino tuo.

XXXVI. *Ἐξηγητὰ καλῆς ἑσπεμένη σοφίης.*) dualis est, ut apparet, sed vice pluralis. quare cum *Ἐξηγητὰ* ponatur hoc loco pro *Ἐξηγηταί*, ultimam sua natura habere brevem non potest. Ego certe corripere non auderem, neque legisse me unquam scio.

Vides, amice Lector, in quinquaginta versuum numero, quadraginta propemodum naevos conspici; deformes, pueriles, pudendos: quorum nullos omnino animadverterat Heros *Valerius*, magnus ille Eloquentiae, & Graecae Linguae professor. Non viderat haec, inquam, *Valerius*; Argus ille saeculi nostri; ὁ πολυόφθαλμος; neque oculatior hac in re fuit eo ipso, qui scripsit,

plur; cuius tamen errores iste correxisse debuerat. Sed studiis, credo, secretioribus sese totum immergerat, & in reconditas illas & interiores se receperat litteras; neque ad minora ista consideranda, uti nec mens, nec facultas, ita fortasse nec otium suppetebat. Magna est Graecorum licentia Poetarum, clamitabunt illico Heroes nostri. Magnam esse confiteor; & multo adstrictiores esse Poetas Latinos legibus Metricis jam suo tempore questus est Martialis:

Sed tu non ideo cuncta licere puta.

Magnam habent Graeci licentiam; non omnem tamen; nec in omnes syllabas quidvis licet. Daniele audite Heinsum, rerum harum intelligentissimum, si quisquam, virum. Is in sua ad Hugonem Grotium, virum amplissimum, quam Graecis suis praefixit carminibus, praefatione¹, ita de Angelo loquitur Politiano: *Angelus Politianus, vir ingenti praeditus ingenio, ne quid Graecis ejus temporis concederet, quorum auditoria & famam jam invaserat, Poetari quoque lingua eorum voluit. Caeterum haec quoque, pauca si excipias, quale est quod in Emergentem Venerem conscripsit, & fortasse alterum quod in Armatam, illo genio destituitur, qui in Antiquorum Epigrammatis elucet. ut omit-tam, pleraque ne Graeca quidem satis esse. In temporibus quidem, & Syllabarum modis, ea saepe alibi committit, quae non raro in Latinis aliorum acerbè & crudeliter traducit. Nam qui omnia licere Graecis arbitratur, (nota Lector) mecum profecto, & cum priscis auctoribus non facit. Sed de istis alias: cum fortasse exercendi causa animi non pauca notabimus. Apparet, quae magni illius viri super hac re sententia fuerit. atque utinam, quod promittit, fecisset vir praestantissimus, qui*

E 2

haec

haec facere optime poterat! Apparet item, ex veterum omnium, & hujus ipsius exemplo, multa Graecis licere, non omnia. Quod si omnes apud eos Syllabae communes essent, quam gloriam reportaret, qui Graecos versus conscriberet? Quivis id posset: etiam *Jensius*: etiam *Cajus*, si vellet, *Valerius*: praenomine enim nunc suo appellare hominem libet, ne ullo se honore defraudatum conqueri possit. Sed, ut serio tecum agam, mi Lector, nonne turpe prorsus ac pudendum, tot vitia metrica videre non potuisse Eloquentiae Professore? tot errata, circa ipsam linguam, & rem Grammaticam, observare non valuisse Linguae Graecae doctorem; qui peculiari sibi nomine rem Grammaticam vindicat? Quo reciderunt litterae, & imprimis Graecanae? ô Scaliger! ô Heinsius! ô Doufa! *utinam viveretis!* utinam Leidensis Academiae formam adspiceretis; & hos ipsos Graecae Linguae, & Eloquentiae Professores! Et tu, Aegidi Menagi, qui in Graecis carminibus componendis, post Danielelem Heinsium nostrum, facile primas tenes; quid diceres, si in vivis esses? aut tu denique, Matthaeae Slade, qui & Graecae Linguae, & Graecae item Poeseos peritissimus, magnam tibi laudem & gloriam hoc scribendi genere comparasti? ut rideres, si viveres! ut epigrammate aliquo lepidò Heroas istos exciperes! ut barbariem illis suam ostenderes, qui nunc alios *Barbaros* vocant! ut *in ordinem* eos *redigeres*, qui alios nunc *in ordinem redactos* volunt! ut me adjuvasses tu gnaviter; & in bonarum istis litterarum hostibus, ab omni humanitate & elegantia alienis, debellandis ac prosligandis, auxiliatricem illam tuam commodasses manum! Nunc à te deferor, destituor, derelinquor, & facientibus istis in me impetum belluis resisto solus!

Quid

Quid faciam? quo me convertam? bonam causam deferam; & regnum homines istos in litteratos alios omnes exercere tyrannicum sinam? *Non patiar, non feram, non sinam.*

Nunc animus opus, Aenea, nunc pectore firmo.

ἀγε, ἔγχετε σταυλὸν. ἡ δὲ θεὸς ἐν τοῖς λοῦσι. Et utcumque vadis ac brevibus obsessum sit illud & infestum mare, utcumque jam in altum me dederim, & ab omni sit parte

— *Coelum undique & undique pontus:*

Fata viam invenient, aderitque vocatus Apollo.

Sed in viam & ad *Valerium*; tanto enim eum amore depereo, ut ne per momentum quidem ab eo, sine magna animi aegritudine avelli possim. Naevos igitur istos, tam multos, tam magnos, non viderat bonus *Valerius*. Vides inscitiam hominis. Naevos illos eosdem, non esse naevos, & me falsum fuisse, palam omnibus praedicabar. Vides impudentiam hominis. Admonitus deinde à viro docto, (Novit enim quae Swammerdami sunt gesta) idem illud facere non omisit; nec esse, quae dixeram, vitia, asseverare nihilominus dubitavit. Sic *Leidae* loquebatur, sic *Amstelodami*; meque lacestebat continue, & ut ostenderem illa palam, si possem, quae dixeram, provocabat. quod nunc à me factum, ille ipse, existimo, qui facere me posse negaverat, affirmabit. Ex illo in me *Valerius*, qui errorum istorum probe sibi conscius erat,

Ingentes animo, & dignas Jove, concipit iras,
qui horribile illud arcanum patefecissem, & ignorantiam suam omnibus manifestassem. Altum enim spirabat hic homo, ὅς, εἶναι τιναῖ ἐαυτὸν, existimabat, quod

Non artis ulla Musicae peritia,

E 3

Ve-

*Verum, cum illo apud Phaedrum è futore medico,
Stupore vulgi factus esset nobilis.*

Censorem enim se esse credebat, ac Dictatorem, & cum illo apud Eundem Leone, omnes partes sibi arrogabat, ita enim apud eum *Valerius*, Leo inquam *Æsopicus*;

Ego primam tollo, nominor quia Leo:

Secundam, quia sum fortis, tribuetis mihi:

Tum, quia plus valeo, me sequetur tertia.

Quia plus valeo, ait, id est, ut ego interpretor, *quia Valerius sum*. Interim, dum ista concoquere nequitiam potest; & commodam effutiendi in me aliquid occasionem captat, maximo omnium luctu fato concedit Augustissima & potentissima Britanniarum Regina. Partes dicendi in tam illustri funere huic inter alios mandantur *Valerio*. Orationem habuit bene longam, ne vinceretur ab aliquo scilicet, qui in longitudine omnem orationis pulchritudinem collocat; & quidem proximo post collegam die; ex quo apparet prudentia hominis. Ea in oratione haec ejus sunt verba: *Dum itaque ego Augustissimae Mariae decora, non inanibus verborum lenociniis, non pictis figurarum coloribus, non compositis fractarum modulationum, gestulationumve mollium simulacris, ornare, sed modesta, & laetibus conveniente, styli, vocis, actionisque simplicitate exponere, rebusque ipsis & exemplorum documentis demonstrare contendam, &c.* Examinemus, quaeso, hunc ipsum, & attentiore paullulum oculo contemplemur locum. Primum, aut aliquem notavit his verbis, aut neminem. Ille neminem dicit, ego aliquem ab eo, accertum aliquem hominem, designatum puto. Si neminem hinc ante oculos habuit, ineptus totus est locus, & nullo judicio positus, neque quicquam huc facit. Ipsa, quaeso, verba, considera

deramecum, Lector. dicit se, *non inanibus verborum lenociniis, non pictis figurarum coloribus, non compositis fractarum modulationum, gestulationumve mollium simulacris, sed &c. Reginae ornare decora velle.* Paucioribus verbis absolvere potuisset, si hoc modo dixisset: *Orationem habiturus sum, non orationem.* Quid? nullas habebit *figuras* Orator, *nullos colores?* quo modo res exprimet ergo, & ad vivum ob oculos ponet? sine coloribus, credo, ut *Valerius.* Quod pictoribus *color* est, id Poetis & Oratoribus sunt *apta, selecta, idonea, & suo loco posita verba.* iis rem repraesentant, & quasi *depingunt* Summum in his artificium est. Hinc affines istae sunt artes, Poetica & Oratoria, cum Pictura; sic ut Poësis (addo, & Oratoria) ζωγραφία φθεγγόμεν, pictura vero *πικτωσις* sit *πικτωσις* appellata veteribus. Unde illud Horatii:

Ut Pictura, Poësis erit.

Et illud in principio Artis Poeticae.

Humano capiti cervicem pictor equinam

Fungere si velit. &c.

Sed haec omnibus nota sunt, praeterquam *Valerio*, qui nullos admittent *colores*, precipue in *figuris. non pictis figurarum coloribus.* quid igitur sunt *figurae*, quid *Trophi, & Schemata*, nisi *colores* orationis & *lumina*? Vide quam intelligat artem Rhetoricam Eloquentiae iste Professor. *Colores & lumina*, uti pictores, ita Poetae habent & Oraiores, ab iisdem illis pictoribus, propter summam rei similitudinem, utroque vocabulo mutato. At, non *picti* debent esse isti *colores*, affirmabit *Cajus.* Ego vero nego. non sunt *colores*, nisi sint *picti*, immo optimi illi ipsi, qui quam optime, & ad vivum *picti.* Tu ludis, inquit. *Picti* isti *colores*, *pigmenta* sunt. itane vero? nunc te intelligo; ignosce, quaeso stupiditati.

piditati meae, mi *Valeri*. *Davus sum, non Oedipus*. Sed serio tandem. cur tu *colores* istos *pietos* vocas, & rem bonam, ac per se laudabilem, malo appellas nomine? cur easdem *figuras*, *colores* & *lumina* Orationis, *verborum lenocinia* rursus, & quidem *inania*? vel non intelligis quod dicis, vel invidiae plena sunt ista vocabula. Si omnis *figurata* oratio, *pieta* & *fucata* est: si Rhetorum *Tropi* & *Schemata*, *pigmenta* tantum *inania*, & mera sunt *lenocinia*; inanis est omnis Rhetorica; inanis Rhetorum labor, & Oratorum; inutiles omnes ubique Rhetoricae & Eloquentiae Professores. Quae si res ita se habeat, neque ullus omnino in Oratione *Tropis* ac *Schematibus*, *figuris* istis ac *coloribus* locus est; nullus unquam mortalium Tullio scripsit pejus, *Valerio* melius. Sed audi, *o pater*, & si nescis, accipe. *Figurae* sunt necessariae: Poetis & Oratoribus propriae. *Ulus figurarum* est duplex, bonus & malus. Si nullae sunt, languet Oratio: si nimiae, aut affectatae, *fucata*, & ut agebat ille, *calamistrata* oratio est. Media via incedat oportet, qui verae & *priscae* illius eloquentiae laudem affectat. Haec virtus est Antiquorum: haec Recentiorum, qui ad priorum illorum sese normam componunt. Jam autem, si de recto *figurarum* usu, & de mundo illo caetero Oratorio loqui vis, te tamen illo non usurum esse, dicis, nihil dicis, & plane ineptus es: si de *cincinnis* Oratorum & *calamistris*, & omni *fucato* ornatu; multo minus quam nihil, & sine ullo profecto iudicio es. quid enim dicis? te nulla *pigmenta*, nulla *verborum lenocinia*, falsos nullos ac fictitios *figurarum colores*, adhibiturum. Quis unquam sanus hoc dixit? hoc fecit? perinde est ac si diceret, *Latine*, non *Barbare*: loqui te velle. Quis non Latinam ab Oratore Orationem expectat? Quis non &

or-

ornamenta Oratoria ista, sine fuce & pigmento, & lenocinio ullo meretricio; ut honestae matronae, non Aedilem metuenti mulieri, similis videatur Oratio. Illa autem pro rerum ac personarum dignitate adhiberi solent, ut veteres nos docent Magistri, & M. ante omnes Tullius. Contraho argumentum, Aut de vitiis Orationum loqueris, aut de virtutibus. Si de vitiis, nihil agis, dum te malos istos scriptores non esse imitaturum dicis. Id enim officii est, & boni, ut esse vis, Oratoris. si de virtutibus, cur bonae rei malum nomen imponis? cur Tropos & Schemata (de bonis loquor) pictos figurarum colores, & inania verborum lenocinia vocas? id in fraudem est Artis; nec ab ullo Eloquentiae Professore, qui artem istam intelligit, aut potest dici, aut debet. Interiorem eloquentiam spectant quae cum Oratore nostro dicta sunt haecenus. Sequor filum Orationis Ejus, & ad Exteriorem eloquentiam venio. Quid dicit Orator? non compositis fractarum modulationum, gestulationumve mollium simulacris, Reginae decora ornare se velle. duplex est Eloquentia corporis (ita enim recte & vere interiorem illam vocat eloquentiam Cicero), Ea vel in voce & illius consistit regimine; vel in gestu & totius corporis motu: unde corporis eloquentia dicitur; quod corpore fit, & quidem solo; nihil enim hic loci aut ingenium, aut iudicium habet, aut ulla mentis facultas. Haec ab universi corporis actu Actio; à voce & pronuntiatione, ut à parte potiore, Pronuntiatio dicitur. Huic primas, secundas, tertias, tribuebat olim Demosthenes, testibus, & hoc illius iudicium comprobantibus, magnis illis Magistris, Tullio & Quintiliano. Jam autem, quomodo haec percipit Noster? Rogo, utrum adesse haec eloquentia debeat in

F

reci-

recitando, an non debeat? si non; quid ergo sibi Veteres volunt, cum illam requirunt? cum viam illi tantam assignant? quo illa tum praecepta de *Memoria* pertinent? quo illa de *Actione*? Stulti profecto fuerunt Demosthenes, Cicero, Quintilianus, & sapientior illis est multò *Valerius*. Si necessariam tum illam fuisse (antiquis enim Magistris repugnare non audet) nunc vero non necessariam esse existimat, stultescit profecto *Cajus*: si deperditam dicit, insipidus est & *infrunitus*, nec, quid dicat, intelligit. Nec amissa est, nec amitti potest. Quod vero id non capiat *Cajus*, non est mea culpa, *Quirites*, sed hominis, Quamobrem, cum non sit deperdita; cum sit summopere, etiam nunc, necessaria; neque ulla sine ea Oratio haberi, ut par est, potest: quis non animadvertit summam illi curam & operam, quotquot publice verba faciunt, illos vero imprimis, qui alios eloquentiam docent, impendere etiamnum debere. Vocis itaque, ut gestuum corporis omnium, observari regimen debet, & ad subjectam materiam accommodari. Id vel inepte fit, vel cum iudicio. Si inepte; male & Scenice: si cum iudicio, recte & Oratorie. Jam vero, quid illud est, cum se non compositis fractarum modulationum, gesticulationumve mollium simulacris usurum dicit? nonne idem ac si dixisset, se non *Mimum* aut *Histrionem* futurum? quis unquam sic loquitur, ubi de se loquitur? si ergo ad malam *Actionem* ista pertinent verba, inepte & sine iudicio illa applicat sibi: si bonam, legitimam, naturalem, talem denique, qualis in Oratore requiritur; cur rem per se utilem, ac summopere necessariam, tam invidiosis appellat vocabulis? fractas vocis & compositas vocat modulationes. Quasi omnis vox Oratoria fracta esset, & ad
sce-

scenam *composita*: quasi nihil illa aliud esset, quam cantus, & Musica quaedam *modulatio*. Vox inflecti debet, non *frangi*; hoc est attolli, & deprimi: *componi* eadem debet & conformari; nihil tamen *compositi*, & affectati habere. *modulata* eadem sit oportet; sic ut nec loquatur proprie Orator, nec canat; & suavi quadam *modulatione* decurrat Oratio. *Rythmum esse oportet, non cantum*, ait summus ille Rhetor simul & Orator Tullius. Et sane, si in compositione numeri sunt; si numerosa sunt verba, & suis nos afficiunt numeris, dum leguntur; in ipsa voce nihil erit numerosi; nec illa ipsa nos tangent verba, dum audiuntur? Quid quod magnum ad persuadendum momentum illi ipsi sunt numeri? quid quod nullam vim habent, nisi vocis modulatione in nostras se aures insinuent? quid quod hoc artificium calluit optime Tullius? quid quod idem ille *canoram in Oratore vocem* requirat (observa, Lector,) & *poene Tragicam*? *Modulatio* itaque in voce esse debet, non *fracta* non *composita*; sed virilis, mascula, Oratoria. Videamus de *gestibus*. Dicit Orator te dicturum esse sine *gesticulationum mollium simulacris*, id est, se non futurum esse *Gesticulatorem*. *Morionem* aut *Histrionem*. quis ita de se ipso locutus est? aut quis malos gestus & mimicos in Oratore probavit unquam? Graves gestus esse debent, & Oratori, viro gravi, convenientes. Eos autem invidioso rursus ac maligno vocabulo *gesticulationes* appellat Rhetor, & quidem *molles*. quis *gestus* Oratorios *gesticulationes* appellavit unquam? aliud est *gestus*; aliud *gesticulatio*. *Gestus* Oratorum est actio, & *Tragoedorum*; (quorum ut vocem, ita & actionem habere debet Orator; circa res graves enim & serias uterque versatur) *Gesticulatio* autem *Mimorum* & Co-

moedorum. Molles vero gesticulationes, (ita enim loquitur, ne quid criminis & invidiae praetermittat) sunt *Cinaedorum*, & hominum *mollium*. Vide, Lector, quam bene haec nostra intelligat, aut quam injurius sit in eam ipsam artem, quam proficitur, *Valerius*. dicit autem sine istiusmodi gestibus suam se habiturum Orationem. Idem est ac si diceret, se stultum non futurum hominem, sed sapientem. addit ultimo, se sine *modulationum & gesticulationum simulacris* id facturum. Criminatur hic iterum artem Oratoriam noster Orator, quasi omnia *simulata* essent & ficta, quae circa vocem & gestus veniunt observanda: & nihil in iis esset naturale. *Simulacra & simulamina* rerum ipsarum (*εἰδῶς ἡ εἰδῶν* Platonici vocant) exhibent apta & idonea verba: ista verba apta & ad rem accommodata proferuntur voce: vocem subsequitur gestus, & totius corporis motus. Haec autem omnia unam & eandem rem nostris auribus, oculis, animis repraesentant, & totidem quasi oribus ad nos loquuntur. Haec si ignoras, *Valeri*, è Cicerone & *Quintiliano* discere potes: Vide libri undecimi caput tertium) si nosti, bonam causam graves, & Oratoriam artem magna invidia oneras: Sic ut pro stupido plane homine, & harum litterarum prorsus ignaro; aut pro invido ac maligno, & viro parum honesto, haberi impofterum debeas. Plena sunt invidiae itaque, quae perpendimus hactenus, verba; quae nostrum nequitiam spectare *Valerium* possunt, nisi illum plane ineptum & nullius cerebri hominem putes. Ad alium ergo haec pertinent, quam Oratorem ipsum. Is autem alius ego sum. In quo si fallor, nominet, quem designat, nec verbum amplius addam. Quem cum nominare nec velit, nec possit, ego justissima, ut puto, causa me

me ab eo praecipue notatum dico. Urebat videlicet hominem, me aliquid posse, quod ipse non posset; audiebat; id à nonnullis laudari; sibi detractum putabat, quod dabatur mihi. Accedebant Flegiae istius Graecanicae pudendi, ac pueriles, quos ostenturum me dixeram, errores isti. Captat hanc occasionem, (minus quidem opportunam & commodam, in re tam gravi ac luctuosa) & me & artem meam palam ac publice criminandi. Quasi vero nihil aliud esset in omni mea eloquentia, si ullam habeo, nisi *inania verborum lenocinia* quaedam, & *picti figurarum colores*; ficta denique & fucata omnia: quasi item *Actio* mea, ex *fractae vocis modulatione*, & *gesticulationibus* quibusdam *molli-*
bus consisteret tota; *gesticulatoria* denique potius esset eadem illa, & *histrionica*, quam viro gravi ac serio dignus aliquis & conveniens corporis motus. Frustra eloquentiam didicissem; frustra eam publice profiterer; si ejus nunc causam desererem, nec ullo eam patrocinio adjuvarem. Praesertim cum eos ipsos illa nunc hostes habeat & inimicos, qui contra aliorum injurias, & malorum hominum impetus, defendere eam potissimum, ac tueri debebant. Illius itaque causam suscipiam, & cum illius meam. Omnis eloquentia (de interiore nunc loquor, nam de priore prius) simplex esse debet ac naturalis, non abjecta & humi repens, ut cum simplicitate majestas, cum majestate simplicitas jungatur, & *naturali* sua *pulchritudine*, ut ait ille, *exsurgat oratio*. Omnem fucum & falsum ornatum, omnes *cincinnos* & *calamistros*, & universam illam eloquentiam Mecaenatis, odi ego ac detestatus sum semper. *Inania* illa *verborum lenocinia*, & *pictos* istos *verborum colores*, captavi ego aut amavi nunquam. Hanc mihi laudem tribuunt (quod citra invidiam

diam dixerim) qui mea unquam scripta legerunt, tam Poetica, quam Oratoria. Nec meae me obscuritatis, aut eloquentiae nimis fucatae, praeter hunc nostrum *Valerium*, accusavit quisquam. Injurius itaque est dum id facit, & animum suum malignum & invidum aperto nimis indicio facit manifestum. Quam ego omnem injuriam concoquerem facile, nisi & ipsam artem pudenda ista & infami nota adspiceret, ac malam Juvenum animis, tenellis illis ac cereis, & in omnem facile partem se convertentibus, de hoc toto eloquentiae studio infereret opinionem; quam, ubi semel imbiberint, nulla deinde opera evellat quisquam. sic ut pestes ac pernicies Academiarum, *vomicae & carcinomata* litterarum, istiusmodi Eloquentiae Professores vero & suo appellari nomine possint. *Actio* porro omnis, Orationi ipsi conveniens, hoc est, naturalis esse debet ac simplex: cum majestate tamen & gravitate, pro rerum natura ac personarum. Uno verbo, cum Externa Eloquentia Internae illius imago sit ac simulacrum, nullo unquam pacto ab ea dissentire potest, ac discrepare; sed voce simul, & gestu, ac totius corporis motu, rem ipsam ob oculos ponere, & totidem quasi coloribus eandem nobis effigiem repraesentare eam oportet. Id quam factum difficile sit, & quam paucis mortalibus datum, nemo me rectius novit, qui per omnem vitam vix unum vidi aut alterum, cui ista corporis eloquentia sine ullo vitiorum confinio contigisset. Qualis mea sit *Actio*; & quid ipse praestare possim, vel unquam praestiterim potius, judicent qui audiverunt. Id sine invidia, sine gloria etiam, posse dicere videor, nihil in omni mea actione mimici esse aut scenici; nec ullam vocis *modulationem* non Oratoriam, nullam *vocem fractam*, nullas *gesti-*

gesticulationes, multo minus *molles*, (nisi hunc ipsum qui me nunquam audivit, *Valerium*) animadvertisse mortalium quenquam. Calumniatur ergo hic rursus *Valerius*, qui ejusmodi mihi vocem, ejusmodi gestus assignat, & ex *Oratore Histrionem* facit. ipsam deinde artem deridendam propinat, & omnem meam, quam in commune juvenum bonum impendere studeo, operam, inutilem reddere nititur & infructuosam. Sed fallat eum faxis, & illos cum eo omnes, qui hanc mihi palmam detractum eunt. Neque enim artem hanc exercere, & in commune impendere commodum destinam, dum vires suppetat ille, & valetudinem prosperam, à quo bona ad nos dona descendunt omnia. Quam meam curam & operam, uti honestam, ita Reipublicae & Ecclesiae utilem, si agnoscere nolent homines hodierni, agnoscant Posterit. Nemo sane, nisi *Valerius*, artem hanc meam *Histrionicam* unquam vocavit, aut *gesticulatoriam*: à Mimo enim & Histrione tantundem abesse me puto, quantum hunc ipsum à bono Oratore *Valerium*. Quid vero de me sentiant homines, & quid de hac mea, uti tu vocas, *Histrionica* judicent, ex eorum ore qui audiverunt, ex eorum scriptis, qui ab aliis id acceperunt, & illorum ipsorum librorum, qui omnium manu teruntur, testimonio publico, nosse id potuisses, mi *Valeri*, & nosse te optime puto. Sed tanta in te arrogantia est, & φιλαυτία, ut tua id auctoritate evertere te posses existimes: tanta in te invidia & malignitas animi, ut illud in me non agnoscas, cleves etiam ac reprehendas, quod exteri homines & peregrini, ut nullo odio, ita nec ulla mihi amicitia cogniti, amant, laudant, ac pleno palam ore depraedicant. Atqui haec ipsa Exercitia, quae tu derides tantopere, publica, eo ipso

ipso in loco, in quo nunc es, & à primis Academiae fundamentis habita sunt; & ab amplissimis & illustrissimis Curatoribus, bono sane ac prudenti consilio, per Petrum deinde Cunaem, doctissimum ac disertissimum virum, sunt revocata. Nunc in alia itur omnia: nunc disputationes habent Historicas: nunc rixari amant, quam loqui; & Scholasticam exercere eloquentiam potius, quam Oratoriam. Et quid fieri aliter posset, cum eloquentiam omnem derisui habeant, qui profitentur? cum omnes Oratores Histrones putent? cum eloquentiam non intelligant, qui alios eloquentiam docent? Vides, opinor, Lector, ex iis, quae hactenus diximus, istum Oratoris nostri, quem adduximus, locum, non ipsum respicere posse, sed alium quempiam: istum autem, praeter me, esse posse alium neminem. Respondet ad haec *Orator*, se neminem notare voluisse: Oratorio se more fecisse; ita enim moris Oratoribus esse. quibus? *Cajis? Valerii? Accinctis?* ita certe non solent boni, nisi cum de malis loquuntur. Scio Oratores res & personas extollere, se & facundiam suam extenuare: imprimis si persona sit talis, quae nulla laude indigeat, nullo ornatu Oratorio egeat, qualis haec fuerat laudatissima, & omnium praeconio major Regina. Quid autem facit hic noster? dicit se sine inanibus verborum lenociniis, sine pietis figurarum coloribus; sine compositis fractarum modulationum, gesticulationumve mollium simulacris esse dicturum. Quid haec ad Regiam? quid ad Orationem? quis unquam ita dixit? aliter dicere debuisset, si id voluisset. Vis exemplum? hanc ipsam meam Orationem funebrem vide, ut in re simili simillimum tibi exemplum adducam. Verba mea, sub finem Exordii, ita se habent: *Quod dum facio, Audito-*

ditores, nolite existimare me vestram imploraturum benevolentiam. Promittit eam mihi frequens iste concursus: promittit subjecta materia. Quis enim non amet tam amabilem Principem, & suo vicissim amore non prosequatur, quae suo nos omnes amore est prosecuta? Nolite item putare me falsas ei laudes assignaturum, aut fucum ullum ac lenocinium in Ea extollenda adhibiturum, quae omnem falsum ornatum respuit atque contempsit. Idem dixi, quod tu, sed aliis verbis, alio modo. Quin & hac ipsa lenocinii voce, qua tu uteris, usus sum. Nemo tamen mortalium, quinquam meis hisce verbis perstrictum dicet: nemo, non aliquem, tuis. Mea omnia ad Reginam referuntur: tua, ad malos istos Oratores. Legat haec aequus Lector; utrumque locum perpendat; & suo ipse arbitrio suffragium ferat. Quamobrem, cum ista, quae examinavimus, Orationis verba, non auctorem ipsum, ut vidimus, sed alium quempiam, neminem vero alium, nisi me, aut me certe potissimum, spectare possint; justissimam omnino causam videor habuisse, & me & artem meam, ab istius injuria hominis vindicandi; & quam malus, ac parum idoneus, tum ad scribendum, tum ad dicendum, fuerit iste Orator, brevi hoc Epigrammate ostendendi.

IN FRIGIDUM ORATOREM.

Conscendis cathedram Orator, pluresque per horas
Blaeso auditores enecat eloquio.
Quam varii gestus! quam pulchri! quamque decori!
Quae vocis gravitas, quod moderamen erat!

G

Fri-

Frigidius nihil est hoc Oratore, nihilque
Languidius: betam dixeris, aut lapathum.
Asperius nihil est hoc Oratore, nihilque
Horridius: lignum dixeris, aut lapidem.
Nobile Lugdunum, Suadae domus, heu! ubi nunc est
Oris & ingenii vis prior illa tui?

Quid in his verbis est, quod injuriam aliquis, aut convitium appellare merito possit? dico *frigidum* eum esse Oratorem & *languidum*, quantum ad stylum: *asperum* & *horridum*, quantum ad vocem & gestum: *blaesum*, quantum ad naturale ipsi vitium in loquendo. Risi exteriorem ejus eloquentiam, admirando, laudando: deploravi conditionem Academiae Lugdunensis, quae pro Cunaeis, Baudiis, Heinis, istiusmodi nunc Oratores ac Poetas habeat; & eo ipso in loco eloquentiam doleo perierisse, ubi olim floruerat maxime. Quod in his est convitium? quid non, uti vere a me dictum, ta & recte? Plus uno autem modo male se fidei hominem esse *Cajus* hic ostendit *Valerius*. Nolite convitium credere: confirmabo, quod dixi. Primum hoc Epigramma semper in ore habuit, quasi nihil praecessisset, ego vero ultro eum aggressus fuissim: In nupera etiam carminum omnium editione, quae sane miror in lucem eum protrudere, & tam putida ac plus quam puerilia orbi erudito ostendere ausum fuisse, priore hoc meum loco collocat carmen, suae vero istum Orationis locum, ut & Graecam Elegiam istam, dissensionis omnis originem, praeterit ac dissimulat: Deinde titulum carminis alium facit, quam ego feceram; scripseram enim, *in frigidum Oratorem*, ille vero edi jussit, *in Blaesum Oratorem*. in ultimo versu fuit, *oris & ingenii*, ille autem *vocis* excudit. Non magna est dif-

differentia, sed melius illud meum; alterum languidius;
& illius certe non erat ista immutare, quae exacte, &
summa fide repraesentari debent. De invidia vero, quam
ex ultimis verbis apud suos creare mihi studet Colle-
gas, dicam epistola tertia. Huic autem meo, quale-
cunque sit, Epigrammati reposuit paullo post, aut re-
poni ab alio iussit (dicit enim carmen se non fecisse,
omnia autem, quae in isto sunt carmine, subministrasse)
acrem hunc ac mordacem Iambum.

IN MORIONEM LOMBARDUM

Lucian. Sseudosoph. εὐάνθωνες ἀρα ἡμᾶς βάρβαρον ὦν.

D Ic, Morio, Dic Imperatricum Tibi pag. 29
Quis Auctor est idoneus?
Thuscusne Ludio, aut Haruspex quispiam,
Lombardus an Cognominis?

Nam quis alius Latinitatem finxerit
Tam barbaram, & Lombardicam?
Sed fallor. Ortwinis enim illa Gratys
Debetur Eloquentia.

Hoc ex oleto prodiit Divinitas pag. 33
Visibilis in terris Tua.

Hoc prodierunt foetidae sordes, quibus
Deesse dum narras suis

Regis Gulelmi saepe personam inquinat pag. 15. & 12.
Ipsam, Miselle Morio;

Hoc Humilitatem denique illam protulit, pag. 31.
Qua Pectus Erectae Indolis,

Et mentis Heroina Maximae, tamen
Notatur abs Te turpiter.

Sed Gratianis illud est Opus Bonum,
Dignum Mehercle, Morio,
Quod iste nostris denuo in Provinciis
Manifestet Ortwinii fide.
Sic ut nihil, sic ut nihil, sic ut nihil, pag. 23. Ter, & alibi Saepis-
sic ut nihil praeclarius sim
Currentis anni Phoebus ipse viderit. pag. 16.
Hinc fortiori foedere pag. 12.
Se junget Ortwinio deinceps jam suo,
Et caeteris ejus notae:
Bonum relinquens Tulliam Oratoribus,
Quos Frigidos Bellus vocat.
At Gratianae Doctor Eloquentiae,
Seu Longobardae mavelis,
Historia quae Te fovit? an spurcissima
Viterbiensis Annij?
Panthaea, Cyri an inde Conjux est Tibi? pag. 24.
Sic est, fues sic certe olent.
Sed merda Te quaecunque quondam paverit
Quocunque sterquilinio.
Nunc in Theatrum prodis undique contulus,
Venustus ut Nepotulus,
Ut pullus ipsius Diones scitulus,
Quem feminae certatim ament.
Hic par Bathyllo post Precatiunculam.
Famam tueris bellule.
Et arte gestis omnium pulcherrima,
Placens potissimum Tibi.
Quin fretus ergo mimicis his dotibus,
Contemnis istos Frigidos,
Tuamque gesticulariam qui non amant,
Non assis aut flocci facis?

Unum

Unum est tamen, Tibi ferendum neutiquam,
 Tanta quod Artis Principem,
 Quod Archimimum Te, putet se vincere,
 Palamque jectet DIABOLUS;
 Hic dignus, ira Morionis qui cadat,
 Tuamque sentiat manum.

Rogo candidum Lectorem, an proximo meo Epigrammate, etiam si aggressor fuisset, & nihil omnino praecessisset, tale quid ab isto homine promeritus essem. Plena sunt maledictis & convitiis omnia. Nunc Morionem me vocat; ob gesticulationum mollium simulacra, credo; nunc Lombardum, quia Petrus vocor; adeo omnes Petri huic nostro Lombardi sunt: Argutum hominem! Nunc Ortwinio me Gratio comparat, barbaro homini & obscuro; quem epistolae ille obscurorum virorum respiciunt Huttenianae. Hinc ab hoc Gratiana mea appellari eloquentia debuit, ut à Lombardo Lombardica. En merum frigus! Nunc Mimium me vocat, & Archimimum, &, quasi id parum esset, etiam Bathylum. Olleum praeterea & foetidas sordes, merdam & sterquilinum meam istam vocat Orationem: me vero suam. Quid est Scurram agere, si hoc non est? Scurrilia ista sunt verba, nec ulli honesto viro convenientia. Quid & comptulum me appellat & venustulum, & pullum Diones scitulum, quasi & hoc mihi fraudi esse deberet, si aliquantulum eo essem nitidior. Artem denique ipsam, dotes mimicas & gesticulariam nominat. Vides, Lector, verba ἀπαξία, hoc est plaustra convitiis & scommatibus. nunquid justa de causa mihi irascitur auctor istius carminis, quod eum appellaverim scurram? quo alio nomine, quaeso, fuerat appellandus?

uter nostrum , rogo te Lector , ut jam aggressor ego fuerim primus , prior dixit convitia ? uter alterius famam laceravit prior ? quid meum istud *Blaesus* ac *Frigidus* cum hisce commune calumniis habet ? sed , ut nulla in eum scommata jeci , ita nec laesi prior . Diu impressa fuit ejus Oratio , antequam meum illud Epigramma conficerem . An vero iste me spectet locus , praeter ea quae superius dicta sunt , testis est hic iambus : qui nihil aliud est , nisi istius explicatio loci , & interpretamentum . Vidisti , ut opinor , Lector , malignum hominis animum & virulentum : nunc candorem ejusdem vide , & sinceram fidem . Cum sex istis versibus hujus iambi posterioribus unum è Collegis suis aperte nimis notatum fuisse animadverteret , (qui ob hoc unum , quod melior ipso esset Orator , *Diabolus* ab eo meruit appellari ; adeo non *Vatiniano* , sed *Diabolico* plane prosequitur odio , quicquid Oratorium dicitur) partem istam postremam tacite omisit , nec in adspectum hominum lucemque proferre sustinuit . Sciunt autem partem istam annexam fuisse , & eadem manu conscriptam , quicunque hoc apud me carmen viderunt : & scire etiamnum possunt , quicunque illius autographum videre desiderabunt . Dubium vero non est , quin rectum ad me exemplar fuerit missum , ac genuinum , cum ad me potissimum verborum illorum sensus pertineat . Pro carmine tam atroci & infami , hoc breve illi Epigramma reposui .

IN BATTUM
ORATOREM & POETAM.

Pessimus Orator , nec non & pessimus idem
Nostris Poëta saeculi ,

Oste

Ore suam blaeso Regis aë in funere nuper
 Ostendit eloquentiam.
 Nunc palmas, Gulielme, tuas sermone pedestri,
 Versuque cantat flebili.
 O caput insulsum, nec sacra ad talia natum!
 Quid inde captat gloriae?
 Orator fuerit melior, meliorne Poeta,
 Dat judicandum Posteris.

Quid scommatis in hoc Epigrammate, aut amaritudinis? *Battum* voco, non *Blaesum*, ut ipse modo, quod ineptum foret. Habebat autem Battus τὸν δεσμὸν τῆς γλώσσης vinctum ac ligatum, nec satis σαφῶς loquebatur, ut olim Claudius. dixi *pedestri sermone*, & *versu flebili*, id est humi repente & miserabili, victoriam Regis decantasse. dixi eum *insulsum* fuisse, qui versus faceret, ad quam eloquentiae partem natus non esset. *Pessimum* *Oratorem* & *Poëtam* esse. Vera autem ista sunt omnia, nec ulla in iis calumnia est. Utcunque enim peiores illo esse possent Oratores & Poëtae, quis usquam eloquentiae Professor aut languidiores Orationes composuit, aut peiores versus? si alterius cujusdam artis ac disciplinae Professor ista fecisset, tolerari possent utcunque: in Eloquentiae Professore quis haec ferat? *Insulsum caput* vocavi: duriusculum est. is tot convitiis & maledictis me incessit, ut in superiori carmine vidimus, unum vero verbum duriusculum à me prolatum ferre non potest? Et quis est *insulsus*, nisi qui sine sale & iudicio est? tu illum hominem iudicium habere existimas, qui istiusmodi versus facit? ego sine ullo eum iudicio, insipidum & insulsum, ac plane ἀναλόν puto. In fine Epigrammatis, ubi acumen esse deberet, nihil aliud dixi,

nisi

nisi cum expendendum Posteris dare, *meliorne Orator an Poeta* fuisset. Quid minus acerbe dici in quenquam potest? Quomodo autem ille se gessit? duas continuo Elegias, quasi una non sufficeret, & mordacem rursus Jambum misit, & omnes in me irarum habenas relaxavit. Lege, quaeso, Lector, & ad infantiam hominis, & insignem ejusdem malevolentiam obstupescas.

PETRULLUS BAVIUS AD PHOEBUM.

*Prima dicte mihi, summa quoque dicte Camoena
Semper, nam solitum est illud, Adeste dij.
Nuper, Phoebe, tuam venit novus Hospes ad aram,
Quam tenui in Batavis haftenus unus ego.
Non ego de multis unus, sed quem super omnes,
In coelum & Scenam jam pia fama vehit.
Qui nihil adversa dixi fecique Minerva
Unquam, qui toties omnia puncta tuli.
Et bene gesticulor, bene fracta fibilo voce,
Et varios digitis mollibus orno sonos.
Ut conferre ausit mihi se neque ludio Circi,
Histrio nec tantis artibus alter agat.
Que tamen o quales mecum quantaeque peribunt
Cum quali & quanto (proh dolor) artifice!
Adde, quod & Vates vitioque immunis ab omni,
Cum volo, celsa inter nubila condo caput.
Nec me putidior quisquam est aretalogus usquam,
Qui melius laudes praedicet ipse suas.
Nec acile invenies, qui mecum insaniat aequae,
Aut insana aegri somnia plura crepet,*

Et

Et recte, sanos nam dudum, Phoebe, poëtas
 Pegaseo exclusit flumine Democritus
 Nonne igitur solus mereor tuus esse sacerdos?
 Carmina uti solus condo linenda Cedris.
 Quin alios ergo, ac imprimis protenus arces
 Illum, quem nosti, limine, Phoebe, tuo,
 Qui prosa atque metro mecum certare protervus
 Audet, & irridet meque measque minas.
 Acriter inclamem licet: Aevi pessime nostri
 Scriptor, cede mihi, cede Helicone meo.

PHOEBUS PETRULLO.

A T tu cede loco, caput o sanabile nullis
 Anticyris: adytis, morio, cede meis.
 Gesticulatores doctrinae respuit ara;
 Respuit insanos, & procul esse iubet.
 Cede meis, pecus ignavum, peneiralibus, audin' ?
 Quid restas? patriae pondus inane tuae.
 Non satis est dixisse: ego primus vertice Musas
 Deduxi Aonio primus ego in patriam.
 Cum te dira fames argenti vexet habendi
 Fejunum, & misere livor adurat iners.
 Paucula componas cum carmina ter quater anno,
 Quae sine me & Musis carmina solus amas.
 Quae sunt nervorum, quæ rerum expertia pror sus,
 Tinnula verborum naenia, frugis inops.
 Quid tibi cum Latio, quod non intelligis? hirtis
 Conspurcas faede quid mea sacra modis?
 Cede locum melioribus, & te protenus aufer
 Hinc usque in mediam, pessime, barbariem.

H

IN

IN PETRULLI BAVII FRANCLAM
ELEGANTIAM.

*Petrullus iste Morio,
Nec non & idem ludio,
Nec non & idem cyclicus,
Nec non & idem barbarus,
Ut viribus qui mutuis
(Junctis Latini dicerent)
Captam Namurcum prædicat.
Nec non & idem fatuus
Nostros ait victoriae
Fuisse testes Galliae,
Dum narrat, o quam fatue!
Ut nos eramus illius.
Sed & sibi contrarius,
A Galliae nam Principe
Captam Namurcum fortiter*

*Et occupatam fraudibus
Aurique multo pondere,
Non Marte tradit & manu.
Haec vera sunt illi simul.
O morbidum & stolidum pecus!
Et hic tamen tam fatuus,
Et tam soloecus pessimos
Vocat poetas, Rhetores,
Quos odit & metuit simul.
Sed nos quid illi fatuo
Quid gratiarum reddimus?
Mittatur in morboniam,
Ut morio insulsissimus,
Cui peccius insanabile.*

Quid ineptius & insulsius; quid atrocius & inclementius ab infimae sortis homine aliquo, nedum à viro ullo litterato, proferri posset? Et haec ostendere audet viris cruditis, ac palam edere? Stultos profecto homines omnes, ac sibi similes putat, qui cum patientia quenquam ista hominem legere posse existimat. Sed ineptias omittamus: injurias & convitiavideamus. Primo *Petrullum* me vocat. Dicit se nunquam me nominasse. Quis ergo est iste *Petrullus*? cujus est ista *Franclula elegantia*? res in aperto est, & quivis, quid velit, videt. Haec autem est *elegantia* non *Petrulli*, sed *Caji*; non *Franclula*, sed *Valeriana*, tales enim sales amat *Valerius*, homo minime insulsus, eosque Atticos putat. At id convitium non est. Non dico convitium esse, *Petrullum* dici pro *Petro*; pusillum esse, non magnum: aliquid tamen impuri sub istis vocabulis latet, ac scurrile plane dictetium est. Dicit porro me *gesticulari*,

¶

Et fracta voce, serpentis instar, sibilare, & digitis mol-
libus sonos meos ornare. Quid hoc est aliud, quam
quod in Oratione de *Fractae vocis & gesticulationum mol-
lium simulacris* dixerat? Ecquis dubitet, quin unum ista
& eundem respiciant hominem? quem autem, nisi me;
quem hic certe respicit? quem palam nominat? quem
in subsequentibus versibus *Ludionem & Histrionem, Mo-
rionem* deinde & *Gesticulatorem*, inane patriae pondus,
Cyclicum, Barbarum, fatuum, morbidum, ignavum (no-
ta, quae so) ac *stolidum pecus* appellat? Quis non è
Morbonia venite hominem putet? Quis non releget
Anticyras? nisi sanguinem illi mittere consultius foret,
cui non profuturum sit ullum *Elleborum*. Tene ego ho-
minem sanum putem? tene in honore ullo ac dignitate
positum virum? quae te intemperiae agitant? Dedecus
es & opprobrium Professorii ordinis. Ego vero ista
generoso animo concoxi omnia, nec quicquam illi re-
tribui, nisi hoc breve & exiguum Epigramma:

*Maeonium, quo non vatnm praestantior alter,
Sacrilego laesit Zoilus ore senem.
Carmina Virgilii, quo Mantua gaudet alumno,
Roserunt Anser, Maevius, & Bavius.
Quid mirum, cum passa suos haec nomina Momos,
Carmina si rodant nostra P.....*

Quid modestius reponi potuit, pro tot praesertim con-
vitiis? Comparo te, inquis, *Zoilo & Momo; Anseri,
Maevio, Bavio*. Quid tum? scommata ista sunt? aut
quicquam commune habent cum tuis? Meliore sane ju-
re te *Bavium* dixi, quam tu me. At nomine me com-
pellasti. Quid tum? una tantummodo littera te nomi-

H 2

navi;

navi; cum tu me & nomine & praenomine appellare non dubitaveris. Si tamen & tuum nomen integrum posuifsem, quid reddidisset aliud, nisi *par pari*? Aliud eodem tempore Epigramma conscripsi, nondum visum *Valerio*. Id hoc loco libet adjungere, ut novo eum excipiam ferculo.

IN MALOS POETAS.

V Enimus ad summum. Quis non protrudere versum
Tentat, & in vatum nomen habere choro?
Haec tenus ignoti, vilissima turba, Poetae
Conantur montem scandere Pegaseum.
Jensius elumbes, sine mente, sine indole, versus
Consuit, ille tuum, Belgica terra, decus.
Carmina nullius veneris conscribit, & artis,
Ille tibi notus, Phoebe, Periszonius.

Quodnam etiam in hoc versu convitium est? aut quid in eo offendere *Valerium* nostrum potest? Quod inter malos eum Poetas retulerim? id ipse fecerat prius, cum se publice deridendum praebuit, & tam putidos versus orbi litterato non dubitavit ostendere. Quod postposuerim *Jensio*? Pessime sane scribit *Jensius*: pejus omnino *Perizonius*: qui Eloquentiam publice profitebatur; qui, si bonos facere versus non posset, à malis certe abstinere debuerat. Haec cum ita inter nos gesta essent, & nonnulli me hortarentur, ut responderem huic homini; alii vero, ut generoso contemptu negligerem calumniatorem, a quo facta mihi injuria exolescere facile, si sperneretur; statui posteriorum sententiam sequi, si nihil moveret amplius Adversarius meus; & ita plane me facturum esse, uti & feci, promiseram Amplis-

plissimo Bergio, qui ad pacem me hortabatur & concordiam, cum in Lugdunensi essẽm urbe nuperius. In hoc rerum statu res erat litteraria nostra, cum novo, & puerili plane Epigrammate me laceffit eorundem iste carminum auctor. Quod cum ille divulgare non dubitaverit, non est, cur ego pudori hominis aut honori consulam. Accipe ergo, Lector, & lege.

*Laesisti prior, invidiae me dente laceffens,
Hunc mea rodentem me retudisse puta.
Si bene dixisses, mansisses F..... at nunc
Ut sapias, opus est te tua nosse mala.*

Risi ad conspectum tam putidi carminis, & ostendi inter alios viro hujus urbis primario, qui a puero confectum putabat. Dicit, *me priorem ipsum laesisse*. agnoscit ergo se *laesum*; agnoscit se esse *laesum*, id est *Perizonium*, qui ista scribit, & eadem illa scripserat superiora, & à me scripta retuderat. dicit, se *priorem laesum*. abunde id in praecedentibus refutatum puto. addit, me *Francium mansurum fuisse*, nisi id fecissem. ergo nunc *Francius* non sum. Vereor, ut tu sis amplius *Perizonius*, & ne pro isto in posterum nomine *Valerius* appelleris *Accinctus*. Cum hisce itaque telis me laceffere iste continue meus ex insidiis inimicus; neque, quis ille esset, aut à quo ista venirent, certi aliquid possem concludere; multo minus incerto aliquid homini respondere; & nunc hunc pro auctore acciperem, nunc vero alium; dubius tandem & incertus, auctorem istorum carminum *quicumque* tandem is esset, *qui intra suas se latebras occultaret*, & ex occultis in me insidiis saltum faceret, ut aperto mecum Marte contenderet, hoc Epigrammate meo ultimo provocavi. IN

IN SCURRAM LITTERARIUM,

Intra suas se latebras occultantem.

O Culto quicumque stylo me pungis, & in me
 Illita Tartareo carmina felle vomis:
 Si quid habes animi, cæcis erumpe latebris,
 Et vero tandem nomine bella move.
 Displicet armorum genus hoc mihi: sed tamen adsum,
 Martis Apollinei si tibi pugna sedet.
 Quid latitas, pavidumque antro caput abdis opaco,
 Dirus Aventino Cacus ut ante jugo?
 Turnus ubi est, ubi nunc Mezentius? acer & ille
 Spiritus ingenii, scurra proterve, tui?
 Rumpitur, æque suis gestit prodire cavernis
 Bestia, sed comites prodere, seque, timet.
 Si pergis, nomenque premis, nihil ipse reponam
 Nec tibi, nec sociis, improbe scurra, tuis.
 Si pergis, nomenque tuum mihi pandis, lāmbos
 Armabit rabies in tua fata meos.

Hic vero novas tragaedias concitat istorum versuum,
 auctor dicam, an defensor, *Valerius* quidam *Accinctus*,
 vero & suo nomine, *Jacobus Perizonius*, & sese à me
scurram appellatum clamat. Ego vero nego & perne-
 go. *Auctorum* istorum carminum, quicumque is esset,
scurram vocavi *litterarium*. Is si est *Perizonius*, ipsum
 designasse me fateor: si alius, alium. Negat autem
 iste, se *Auctorem* esse; *scurram* vero illum esse, non
 negat, & in se scomma illud jactum affirmat. Quo-
 modo haec cohaerent? At tu *auctorem* me putasti, inquit,
 cum haec scriberes. Nego, *Valeri*. Incertus enim tum
 plane eram, & dubius, neque deliberati mihi quicquam
 consilii erat. Primum credebam observationes istas gram-
 mati-

maticales abs te esse profectas : carmina vero ipsa ab alio esse composita. Video autem nunc non falsam adeo istam meam opinionem fuisse. Fateris enim in nupera tua epistola, te materiam istam omnem suppeditasse. Pluribus ista te vitia ostendisse dicis, ne de uno aliquo suspicari quis possit. rogo, an id ore sit factum, an scripto? Si ore, nemo tam fidelem memoriam habet, ut singula ista cum pagellarum etiam numero annotata retinere memoria possit. Scripto id itaque factum est: hoc est certo alicui homini tuas istas observationes dedisti, ut inde ille versum conficeret; tu autem vere dicere posses, eos te versus non confecisse. Iste autem qui illos fecit videtur esse Jensus noster, vel vester potius, qui lubentissime istas in se partes suscepit, ut ultionem de illo sumeret scilicet, qui tot mendas in Graeco ipsius versu se ostensurum contenderat. Quod si in hoc fallor, vero simillima certe ista suspicio est. In eo autem non fallor, & hoc verum esse contendo, te auctorem istorum versuum probe nosse. Aut ergo es ille ipse, aut eum, qui est, bene cognitum habes. Cui si tu observata ista tradidisti, ut multum est vero simile, tu ipse pro auctore habendus es. Nam, *quod quis per alium facit, ipse facere intelligitur.* Quod si nec ipse fecisti, nec argumenta ulla auctori suppeditasti, cur carmina ista defendis, qui auctor eorum non es, non aliter ac si auctor esses? cur in te dictum ais, quod in carminum istorum auctorem est à me dictum? non video quo pacto extricare te possis. Ego vero auctorem istorum carminum *Scurram litterarium* appellavi, & appello nunc etiam. *Scurram* enim istum hominem esse suo jure ac merito satis firmis me argumentis ostendisse existimo. Ego hominem istum, nullo addito nomine *scurram* vocavi: tu, qui *scurram* te negas, manifesto me nomine

mine *scurram* vocas. Quid est *scurram* esse; quid *scur-
riliter* scribere; nisi hoc ipsum? Provoco ad aequum
Lectorem, & eos omnes, qui sine praconceptis opi-
nionibus litem istam litterariam nostram pendere di-
gnabuntur: in quorum ego judiciis acquiesco.

Ostendi hac Prima, ni fallor, Epistola, uter nostrum
aggressor, uter calumniatus sit alterum prior; & suo
eum nomine appellari: uter pro *Aggressore* & *Calumnia-
tore*; *Scurra* denique, & homine parum honesto, ha-
beri ab omnibus debeat. Duas alias me scripturum pro-
misi epistolas, & promitto rursus: illud vero nunc ad-
do, me nullas scripturum praeterea alias. Quare, si ve-
quiescat Adversarius meus, quod moris illi non est; si ve-
respondeat, uti solet; ego nullo ei verbo rescripturus
sum quicquam. Ad ea respondebo tantummodo, & ea
sola, quae jam impressa sunt publice; ad versus nem-
pe istos, & Epistolam nuperam. Si quid adferat novi;
si alias moveat lites; quiescam ego, & Pythagoricam
observaturus sum *ἐξευνοίαν*. Nolo enim, ut perpetuae
istae sint contentiones, & ex una in aliam, ut fieri
amat, ut ab hoc ipso factum, incidamus rixam.
Cautior sane, ac suo satis exemplo edoctus esse debue-
rat Heros noster. Meminisse eum oportuerat etiamnum,
quid in Frisia actum esset: & quàm insignem in Franeque-
rana tum Academia famae simul ac rei familiaris jactu-
ram fecisset. Sed amat videlicet homo iste litterarias rix-
as, quas fovet, ac protrahit, & quantum in ipso, sempiter-
nas facit. Haec ut illum spes fallat, ego amputare
litem omnem decrevi: & jam nunc amputo. Quod ut
verum esse ostendam, hujus ipsius Epistolae finem fa-
cio, & litigiosum istum valere *Valerium* jubeo.

E R R A T A.

Pag. 42. Med. pro *haberi potest* l. *possit*. Pag. 53. Med. pro *oliseum*
leg. *olerum*. Ibid. paull. post, pro *quid* & leg. *quin* &. Pag. 56. lin.
penult. pro *Nec acile* l. *Nec facile*. Caetera quivis per se corriget.

005644161